

„Droschak“

ORGANE

de la Fédération

Révolut. Arménienne.

ԴՐՈՇԿԿ

Adresse:

RÉDACTION DU JOURNAL

„Droschak“

GENÈVE (Suisse)

„ՀԱՅ ՅԵՂԱՓՈԽԱԿԱՆ ԴԱՋՆԱԿՑՈՒԹԵԱՆ“ ՕՐԳԱՆ

ԿԱՑՈՒԹԻՒՆԸ ԵՒ ՄԵՐ

ՊԱՐՏԱԼՈՐՈՒԹԻՒՆՆԵՐԸ

II

Քսան տարի շարունակ տւինք աշխարհին անհատական և խմբական հերոսութիւնների, չքնադ, անձնուրաց հայրենասիրութեան ամենափայլուն ապացոյցներ — այժմ մեր կենտրոնական պարտաւորութիւնը պիտի լինի — հետեւելով արեւմտեան ռամկավարութեան, հաւատարիմ մեր ծրագրին, անցեալին, աւանդութիւններին — արծարծել ու իրագործել ներգաշնակ միջազգայն ու թեան գաղափարը այն հաւաքական հայրենիքում, որի անունն է Տաճկաստան:

„Կենտրոնական պարտաւորութիւն“ — անտարակոյս, քանի որ այդ գաղափարի աստիճանական իրագործման մէջ է միայն, որ կարող է ապրել ու բարգաւաճել մեր ազգային ու ժողովրդական էութիւնը ևս:

„Հաւատարիմ մեր անցեալին“ — անտարակոյս, քանի որ միջազգայնութեան սկզբունքը եղել է սկզբից ի վեր անկենսաբար մեր հասարակական-բաղադրական դաւանանքի: Մեր ծրագիրը ներագործել ու խրախուսել է այն. մեր տակտիկը, մեր ընկերների խօսքն ու գործը շիտակօրէն, անկեղծօրէն հանդէպ են գնացել մեր դրացիների լաւագոյն տարրերի համերաշխութեան հազադէպ յորդորներին ու հրաւերներին:

Քարոզել ենք այն՝ նոյնիսկ այնպիսի ժամանակներում, նոյնիսկ այնպիսի միջավայրերում, ուր դրացիները պատասխանել են մեզ վագրի հռչակումով և գնդակների սուլոցներով: Մեր պաշտօնագիրն կոչերը զարնում էին ապառաժներին, մեր հոյակապ պրօպագանդիստները, համերաշխութեան ու եղբայրութեան մեր առաքելները նամարգօրէն մորթուում էին բրդերի ձեռքով: Մի պաղ, անողորմ դժոխք չէզոքացնում էր ամենաազնիւ ճիգերը, չորացնում էր մարդկայնութեան ու հասարակականութեան ամենաչքնադ ծաղիկները:

Չենք վհատել և քարոզել ենք միշտ, հաւատալով, որ մի օր, վերջապէս, կ'ամբլի նոյնիսկ այդ ամենհի գաղանանցը, կը փարատւի նախապատմական բարբերի այդ աղճաժուղը և մենք կը հնձենք մեր սերմանած գաղափարների պտուղը:

Մեր կռիւը — շարունակ յայտարարել ենք այդ — եղել է միշտ բռնակալ կառավարութեան դէմ, ոչ այս կամ այն ժողովրդի դէմ, ինչպէս ձգտել են հաւատացնել մեր թշնամիներն ու հակառակորդները, սկսած տխրահռչակ Մուրադ բէյից — որ 12 տարի սրանից առաջ իր մի բւօշիւրով *) ներկայացնում էր հայ յեղափոխականներին յաշտ Լաւրոպայի, իբրեւ մահմեդական ժողովուրդների երգեհալ ոսոխներ, նրանց դահիճներ ու կոտորողներ — մինչև „Երիտասարդ Թիւրքիայի“ ուրիշ կարգի ռահվիրաները, աւելի անկաշառ ու գաղափարական, որոնք սակայն պատել են հայ մարտիկներին նոյն մուրադական տերմինօգիտով ու եռանդով:

Եղել են, անշուշտ, զուտ վրէժխն դրութեան գործողութիւններ ևս հայ յեղափոխական պայքարի միջոցին, եղել են անհատական մահափորձեր այս կամ այն տաճիկ կամ քիւրդ վամպիրի դէմ, եղել է և խմբական մեծ յարձակումը Խանասորի դաշտում մի սարսափելի աշիրէթի դէմ, բայց այդ բոլոր վրիժառու գործողութիւնները ուղղւած են եղել ոչ մահմեդական նութեան, ոչ քիւրդ ու տաճիկ ժողովուրդներին, այլ միայն նրանց այն արիւնարբու ցեղ-անհատների ու հատաձների դէմ, որոնք յօժարակամ գործիք են դարձել հայաջինջ բռնակալութեան ձեռքում և անանցանելի խոչընդոտ կանգնել յեղափոխութեան ճանապարհի վրայ: Պրօֆօկացիան, գիտակցական գրգռումը դրացի ժողովուրդների դէմ երբեք տեղ չի գտել ոչ „Դաշնակցութեան“, ոչ էլ ուրիշ հայ յեղափոխական կուսակցութիւնների տակտիկի մէջ, ի բաց առեալ մի քանի թեթեւ վրիպումներ շարժման սկզբներում — հայ յարձակողական նացիօնալիզմի կարճատե տիրապետութեան օրով — վրիպումներ՝ որոնք, սակայն, երբեք չեն անցել ամուլ խօսքի ու թէօրիական պրօպագանդի շրջանակներից:

Քիչ բան չահեցինք համերաշխութեան երկար տարիների մեր քարոզներով. հազիւ կարողացանք զինուորագրել մեր դրօշակի տակ մի քանի տաճիկ ու քիւրդ „ընկերներ“ — տարապայման ծնունդ մի զարհուրելի իրականութեան — որոնք հաւատարմութեամբ աջակցեցին մեզ և նոյնիսկ կուեցին մեր ազատամարտը Արաուլի ստորոտներում ու Սասունում:

*) Force et faiblesse de la Turquie.

Ժամանակները փոխում են, պրոպագանդի ճանապարհը—հարթում է ու լայնանում: Մահմեդական զանգեւածների հոգեբանութիւնը առայժմ նոյնն է ընդհանուր առմամբ, բայց այլևս չը կան նախկին անջրպետները. կայ որոշ հնարաւորութիւն՝ մօտենալու, շփելու մեր դրացիների հետ, ստեղծում է կամաց-կամաց մի միջոցորտ, ուր ազգերի համերաշխութեան, միջազգայնութեան գաղափարը կարող է բողբոջել ու զարգանալ:

Կենտրոնական կառավարութիւնը իր կողմից, անտարակոյս, շատ բան կարող է անել՝ խախտած կապերը վերահաստատելու, բացւած վերքերը կազդուրելու և ազգամիջեան համերաշխութիւնը ամրապնդելու նպատակով: Դրա համար պէտք է աշխատել, թիւրքիոյ բոլոր ռամկավարական տարրերը պէտք է աշխատեն, որ միջազգայնութեան սկզբունքը արիւն ու մարմին դառնայ պետութեան բովանդակ վարչական մեխանիզմի մէջ, որ կենտրոնական կառավարութիւնը ևս լինի անկեղծօրէն ու շիտակօրէն ի ն տ եր ն ա ց ի օ ն ա լ, — ոչ ն ա ց ի օ ն ա լ, միջազգային,—ոչ ազգային:

Պետութիւնը, այո, հսկայական դեր ունի խաղալու, բայց աւելի էական գործ է՝ զարկ տալ հասարակական ուրոյն ուժերին ու նախաձեռնութեան:

Մեզ վիճակած է լինել այդ նոր, բարեշրջող միջնորդի մէջ ամենախոշոր ու վճռական գործօններից մինը: Հայ մտաւորականութեան առնձին դիրքը և պատասխանատուութեան զգացումը թելադրում են նրան ծանրակշիռ պարտաւորութիւններ: Որքան որ մենք պարտաւոր ենք զգոյշ լինել ազգայնութեան ու հաւաքական ինքնապաշտպանութեան մեր ամենօրեայ քարոզների մէջ, չը տալ պատրաստներ անգիտակից հակառակորդին, չը տալ տեղիք թիւրիմացութեան, — նոյնքան պարտաւոր ենք զգոյշ ու շրջահայեաց լինել միջազգայնութեան պրոպագանդի մէջ...

Իւ նախ՝ ընդունենք միանգամ ընդմիջտ, որ դատապարտում ենք շաբլոնը, որ չենք ուզում փոխադրած տեսնել մեր երկրի մէջ պատրաստի ֆօրմով լինել, ձեւակերպութիւններ, սքեմներ: Եւրոպական ռամկավարութեան նշանաբանները չի կարելի կիրառել մէկէն ի մէկ պարզ, սիմպլիստ, շաբլոնական ձեւերով, այլ պէտք է ձգտել յարմարեցնել նրանց՝ առանձնապատուկ միջավայրի տնտեսական, քաղաքական ու կուլտուրական պայմաններին:

Եւրոպայից, առաջադէմ ազգութիւններից պիտի փոխառնենք անհրաժեշտագոյնը, — հետազօտութեան մեթոդը: Նրանով զինւած՝ պէտք է նախ և առաջ ուսումնասիրենք մեր միջավայրը. ուսումնասիրենք, որպէսզի գտնենք շփման կէտերը մեր և դրացի աշխատաւոր համայնքների միջև, որպէսզի որոշենք այն լաւագոյն տակտիկը, գործելակերպը, որով կարող ենք ուժգին մղում տալ միջազգայնութեան:

Թե ան բաղձալի հոսանքին, հոգալով հանդերձ միաժամանակ մեր սեփական ազգայնութեան շահերը, նրա տնտեսական ու քաղաքակրթական առաջադիմութիւնը:

Երկրի ուսումնասիրութիւն — ահա ինքնին պատկառելի մի գործ: Ահա մի գործ, որով, դժբախտաբար, մինչև օրս շատ քիչ ենք զբաղւել, գրեթէ չենք զբաղւել: Ցաւ ու ամօթ է յիշատակել, որ բնական տարուց ի վեր յեղափոխական կազմակերպութիւնները չեն կատարել մի հատիկ լուրջ հետազօտութիւն այն տնտեսական ու ցեղագրական միջավայրի մասին, ուր խաղացել է հայկական կուլիւր ու ողբերգութիւնը: Մենք չունինք անգամ մի հատիկ լուրջ գործ հարկատուութեան սխտեմի կամ սխտեմների մասին, հին ըէթիմի տակ. չունինք ոչինչ և հողային ու արհեստային վիճակների, այլևայլ ժողովուրդների պարագմունքի, համայնական կենցաղի, դասակարգային շերտաւորումների մասին և այլն: Չը կայ շատ թէ քիչ արժէքաւոր ուսումնասիրութիւն մեր գրականութեան մէջ նոյնիսկ թիւրքիոյ ընդհանուր իրաւական կացութեան մասին—հին ըէթիմի տակ—որ սահմանադրութիւնը, հաւանականօրէն, չը պիտի կարողանայ կամ չը պիտի կամենայ յեղաշրջել շուտ ու արմատապէս...

Լուրջ հետազօտութիւնների բացակայութեան մեղքը, հարկաւ, ընկնում է աւելի չէզոք մտաւորականութեան, բան յեղափոխական կազմակերպութիւնների վրայ, որոնք տարած կուլի տիրական անհրաժեշտութեամբ, մշտնջենաւոր լարման վիճակում, քիչ կունենային ազատ ժամանակ և մասնաւոր տրամադրութիւն՝ զբաղւելու տեսական ուսումնասիրութիւններով: Համիդիւն խաւարն ու զոհերը այդ դէպքում ևս, անտարակոյս, հանդիսանում է, իբրև մեծագոյն յանցաւորը, նա կաշկանդել է անգամ պաղ, անդամահատող, տեսական մտքի շարժումները, որպէսզի մարդկանց գլուխների մէջ ևս թագաւորէր յաւիտենօրէն—այդ դժոխք-երկրի վերաբերմամբ—անվերժանելի քաօսը...

Այսօր հնարաւոր է մօտենալ այդ քաօսին խուզարկուի հետաքրքիր ու աննդոտ հայեացքով— և դա պէտք է լինի մեր կարգինալ պարտաւորութիւններից մինը:

Կացութիւնը ճաճկաստանում—մի ահաւոր հանգոյց է, որպիսին դժւար է գտնել երկրագնդի որևէ այլ կէտում: Տնտեսութեան և քաղաքակրթութեան տարբեր աստիճանները խճողում ու բախում են իրար մի եզակի իրականութեան մէջ, ուր կրօնների տարբերութիւնը միայնակ ստեղծում է յաճախ անանցանելի խրամատներ ժողովուրդների մէջ, թունաւորում է դրացիական համայնակենցաղը, պայթում է երբեմն արհաւիր անակնկալներով...

Որքան կնճիւղներ—յաղթահարելու... Որպիսի՞ գերմարդկային տակտ, համբերութիւն ու զգուշութիւն է պէտք այն գործիչներին, որոնք գիտութեան և լուսա-

ւորութեան ջահով զինւած, պիտի շարժւին, խաբխափելով այդ իրականութեան մէջ, պիտի հնչեցնեն հաստութեան, եղբայրութեան զօղանջը, պիտի ձգտեն կառուցանելու աւերակների վրայ միջազգայնութեան հմայիչ շէնքը...

Աւերակը—ամենուրեք, կեանքի բոլոր ասպարէզներում, գործունէութեան բոլոր ճիւղերում: Տնտեսական առաջադիմութիւնը մէկն է ամենահօգոր խթաններից ամբողջ կուլտուրական առաջադիմութեան. իսկ «տնտեսականը» խաբխափել է, չորցած, անդամալուծւած: Համիդեան ռէժիմը, սուլթանների ռէժիմը ընդհանրապէս, դարերից ի վեր հոգացել է ամենից առաջ՝ ցամաքեցնելու ժողովուրդների ամենամեծից աղբիւրները, որպէսզի ստեղծէ պարիսների անմուռն, իրէպալական հպատակութիւնը:

Պետութիւնը եղել է հարազատ արտայայտիչը տնտեսութեան. թէ մէկը, թէ միւսը քարացել են, անշարժացել դարերից ի վեր, իրարու վրայ ազդելով, փոխադարձաբար պայմանաւորելով: Այն վայրերում միայն, ուր հին, փտող օրգանիզմը, աշխարհագրական դիրքի ու այլ պայմանների շնորհիւ, շատ թէ քիչ ենթակայ է եղել եւրոպական կապիտալի ու բաղադրութեան ազդեցութիւններին, դիտում ենք այսօր տնտեսութեան, արդիւնաբերութեան աւելի բարձր ձևերի սահմանափակ ներմուծումները: Կողք-կողքի ապրում են օսմանեան կայսրութեան մէջ—հին, միջին և նոր դարերը. կողք-կողքի—հնագրեան ստրկութիւնը, միջնադարեան ճորտութիւնը և նորդարեան վարձու աշխատանքի ու կապիտալիզմի սիստեմը: Մի տեղ հպարտ սուլում է շոգեմեքենան, զարգանում է գործարանային արդիւնաբերութիւնը, զարգանում է և անխուսափելի հակամարտութիւնը փողատէր ու գործաւոր դասակարգերի միջև, սկիզբ է առնում պատմական կռիւը զանգւածային գործադուլներով ու տնտեսական պահանջներով—մի այլ ծայրում, նոյնիսկ շատ մօտիկ, հէնց այդ նորածագ «կապիտալիզմի» բթի տակ՝ բիւրդ աւատականը քշում է դաբանակով իր դարաւոր քմահաճոյքին մատնւած պարիսների նախնիները և միահեծան շահագործում է նրանց գրաստի աշխատանքը:

Ազգաբնակչութեան ճնշող մեծամասնութիւնը դեգերում է նահապետական բիրտ ու գաճաճ տնտեսութեան շրջանակներում, որը տեղ-տեղ խփում է նոյնիսկ զուտ բնական տնտեսութեան մէջ (*Naturalwirtschaft*): Եւ իբրև հետեանք, իբրև հարազատ անդրադարձում այդ կացութեան, մենք տեսնում ենք, որ դասակարգային զանազան աւորումը ևս, կամ դասակարգերի շերտաւորութիւնը, նոյն նահապետական վիճակի մէջ է, թող ու հազիւ նշմարելի: Այդպէս է մանաւանդ մահմեդական ընդհանրութեան

մէջ: Դասակարգերի այդ զանազանաւորումը (*differentiation*) մի տեսակ աստիճանացոյց է ժողովուրդների առաջադիմութեան, հասունութեան: Սովորաբար, որքան աւելի յետամնաց է մի հասարակութիւն, այնքան աւելի միապաղաղ, հոմոթէն է նրա կառուցւածքը, այնքան աւելի թոյլ ու տարտամ են դասակարգերի տարբերումները: Եւ ընդհակառակը: Պրօգրէսը, մարդկային յառաջխաղացութիւնը կայանում է աստիճանական զանազանաւորման մէջ, աստիճանական փոխանցումի մէջ—միապաղաղից դէպի ալլազանը, համատարրից դէպի բազմատարրը, հոմոթենից դէպի հէտէրոթենը: Եւ երբ ազգի անունով երգւող մտքի ու կորովի տիրացուները աղաղակում են, թէ «ազգը կազմող բոլոր անդամները մէկ պիտի ըլլան, մէկ համոզումով ու դաւանանքով»—նրանք փարում են անցեալին, ոչ ապագային և ոչ ներկային:

Տնտեսական զարգացումը առաջ է բերում դասակարգերի շերտաւորում, իսկ այդ վերջինը ծնունդ է տալիս կուսակցութիւններին: Տնտեսութեան, դասակարգերի, կուսակցութիւնների ու դաւանանքների այդ տրամաբանական շղթայակցութիւնը քաղաքակրթութեան անհրաժեշտագոյն պահանջն է, նոյնիսկ նրա ներքին բովանդակութիւնը—և ուր չը կայ այդ շղթայակցութիւնը, այնտեղ խաւար է, յետամնացութիւն, վայրենութիւն:

Մեր մահմեդական շրջապատի համար միանգամայն բնորոշ է այն հանգամանքը, որ այնտեղ չի շեշտւում կամ թէ շատ թոյլ ձևով է շեշտւում կուսակցական զանազանաւորումը: Քրդերի մէջ՝ աւելի ևս թոյլ, քան թիւրքերի մէջ: Դասակարգային թոյլ շերտաւորման հետեանք, անշուշտ... Համայնքն ասես քարացել է: Սուլթանների ու զինւորական կաստայի դարաւոր տիրապետութիւնը, միացած մի անօրինակ կղերի բռնակալ հմայքի հետ՝ տափակացրել են մահմեդական զանգւածներին, հաւասարեցրել են նրանց՝ ստրկութեան ու տգիտութեան մէջ: «Ազգը», «միլլէթը» համարեա մէկ է... Բայց դա կոպիտ, մեքենական միութիւնն է, որ նոյնանում է երամականութեան: Դրանից էլ տառապում է այսօր և երկար ժամանակ դեռ կը տառապէ օսմանեան պարլամենտարիզմն ու առաջադիմութիւնը, ուր առայժմ վճռական գործօն է հանդիսանում թիւրք միապաղաղ ու երամական մեծամասնութիւնը: Այդ տեսակ միութեամբ ժողովուրդները կարող են թերևս աջողութեամբ մղել գոյութեան կռիւը, բայց ոչ քաղաքակրթութեան: Պարզ հօռային համերաշխութիւնը, ուր ծայր չեն տալիս անտաօնիզմները, հակադրութիւնները, ուր չը կայ բաղխում կարծիքների, դաւանանքների՝ սովորաբար ստեղծում է ճահիճ և միանգամայն ճիշտ է յայտարարում գերմանական իմաստութիւնը. «Ohne Partei kein

Fortschritt!», — առանց կուսակցութեան չը կայ պրոգրէս, չը կայ առաջխաղաղացութիւն: Այդ տեսակ մի ճահիճ է ներկայացնում, կարելի է ասել, հելլեն համայնքն ու պետութիւնը, ուր նոյնպէս «ազգը» համարեա «մէկ է», չը կան կուսակցութիւնների ու դաւանանքների խիստ տարբերումներ, մրցակցութիւն ու սուր բաղխումներ... Եւ կեանքը լծացել է այնտեղ, մտաւոր ու կուլտուրական առաջադիմութիւնը անդամալուծւել է ու հասցրել երկիրը «արագհասելի քանակութեան» աստիճանին՝ միջազգային արեօպագի մէջ... այն ժամանակ, երբ շրջապատող բաւկանեան պետութիւնները տենդային աճապարանքով վազում են արեւմտեան ազգերի ետեւից, իւրացնում նրանց կուլտուրայի արգասիքները և դառնում ըստամեանայնի պատկառելի մեծութիւններ:

Այդպէս ուրեմն. անտեսութիւնը—նահապետական, ընդհանուր հասարակական կառուցւածքը — նահապետական, համարեա միապաղաղ. դասակարգային շերտաւորումները — տարտամ, անկերպարան, կուսակցական կեանքը իր սաղմնային վիճակում, — ահա թէ ինչպէս է պատկերանում մեզ իր խոշոր, տիրապետող գծերով՝ իրականութիւնը Տաճկաստանում, մասնաւորապէս ասիական թիւրքիայում, մասնաւորապէս մահմեդական զանգւածների մէջ:

Մի այդպիսի միջավայրում է, որ հայ գիտակից մտաւորականութիւնը, զինւած ժամանակակից ռամկավարութեան նշանաբաններով պէտք է հրապարակ իջնէ՝ ի կատար ածելու աստիճանաբար կ'ուղտուրեցեցի, «լուսաւորութեան կրողի» իր պաշտօնը հանդէպ խաւար Արեւելքի, — մի պաշտօն, որ նրան յաճախ յատկացրել են եւրոպացիները:

Ինչպէ՞ս պիտի կատարենք այդ հսկայական առաքելութիւնը. ինչպէ՞ս պիտի վարենք ռամկավարութեան ու միջազգայնութեան սրբազան կռիւը՝ նախապաշարումներով ու բռնութեան պաշտամունքով սնւած, յղիացած այդ Արեւելքում...

Մտաւորականութեամբ, արդարեւ, մենք աւելի հարուստ ենք, և այդ է թերեւս, որ արժանացնում է մեզ կուլտուրատրեքների պատուաւոր տիտղոսին: Սակայն, խաւար ու յետամնաց է նաև մեր, հայկական իրականութիւնը: Համեմատաբար, անշուշտ, նա փոքր ինչ աւելի բարձր է. կուլտուրայի ու առաջադիմութեան վերոյիշեալ ազդակները — արդիւնաբերական առեւտրական կեանք, դասակարգային, կուսակցական զանազանաւորում, գաղափարական մրցում և այլն — աւելի են շեշտւում մեզ մօտ. բայց արտօլիւ, բացարձակ առումով, ի դէմս մեր ժողովրդի ահագին մեծամասնութեան, մենք ևս դեռ ապրում ենք կուլտուրապէս վերին աստիճանի աննախանձելի մի շրջան:

Բայց եթէ անգամ հայկական անտեսութիւնը լինէր զարգացած ու բարգաւաճ, դասակարգերը աւելի զուած ու որոշւած, հողը աւելի պատրաստ դասակարգային պայքարների համար, — հայ ռամկավար, առաջադիմ մտաւորականութիւնը, այնուամենայնիւ, որոշ չափով պիտի կաշկանդէր իր պրօպագանդի մէջ... Պիտի կաշկանդէր այն պատճառով՝ որ հայութիւնը չի ներկայացնում մի գոց, ուրոյն միջավայր, ուր կարելի լինէր ազատ թռիչք տալ գաղափարներին ու պայքարներին, վազել առանց յետ նայելու, առանց զարտուղի ճանապարհների դիմելու, դէպի բարձր առաջադիմութեան ու քաղաքակրթութեան հանգրւանները, հրապարակ նետել ռամկավարական լոզունգներն ու գիտութեան վերջին պատուիրանները, ամենասուր, ամենամաքուր, ամենացայտուն իրենց ձեւերով... Պիտի կաշկանդէր այն պատճառով, որ գոյութիւն ունի վերը յիշատակած խառնափնդոր իրականութիւնը, ցեղերի ու տարբեր քաղաքակրթութիւնների այն անօրինակ շփոթը, որ բնորոշում է մասնաւորապէս թիւրքա-քահայկական միջավայրը և որ չափազանց պիտի բարդացնէ յետայսօրեան մեր կռիւը՝ յանուն միջազգայնութեան ու ժողովուրդների իրաւահասարակութեան:

Հակամարտութիւնը փաստ է: Թիւրք ու քրիստոնեայ տարրերի միջև անջրպետը կայ, նա եղել է միշտ, անկախ բռնակալութեան գրգռումներից ու դաւերից: Եւ այդ դարաւոր հակամարտութիւնը եղել է, անշուշտ, այն մեծագոյն պատճառներից մինը, որի շնորհիւ «մեռած տառ» են մնացել սուլթանների այլևայլ ժամանակ արձակած բէֆօրմային ծրագիրները — Թանզիմատ, Հատտի-Հումայուն և այլն — ծրագիրներ, որոնք արդիւնք են եւրոպական պետութիւնների ի գործ դրած ճնշումների... Տաճկաստանը ուժեղացնելու և ռուսական հեռաւոր արշաւանքները կանխելու նպատակով: Երկու խոշոր տարրերը օսմանեան կայսրութեան մէջ — քրիստոնէութիւն ու մահմեդականութիւն — կարելի է ասել, ներկայացնում են երկու տարբեր քաղաքակրթական հակումներ: Ռամկավարական հոսանքները շեշտւում են գրեթէ բացառապէս առաջինի մէջ, այն ինչ՝ երկրորդը — մահմեդականութիւնը — իր բոլոր խաւերով, անգամ կրթւած մտաւորականութեամբ, առայժմ հզօր թոււմ է կանգնած ճշմարիտ ռամկավարութեան դէմ, չի ուզում թող տալ քրիստոնեաների իրաւահասարակութիւնը, նրանց մուտքը քաղաքական իշխանութեան մէջ, համարելով այդ՝ մի տեսակ ոտնձգութիւն Իսլամի կրօնական աւանդութիւնների դէմ... Բոլոր թիւրքական վերանորոգիչները սնւած են եղել այդ ճակատագրական անվստահութեամբ դէպի քրիստոնեայ տարրը և դեռ 1876 թւի միթհատեան պարլամենտում, ուր երամականութիւնը, մեքենական համերաշխութիւնը հասնում էր իր ծայրագոյն աստիճանին (պատգամաւորները հլու հնազանդութեամբ ընդունում էին կառավարութեան

ամեն մի առաջարկը, «էվէթ», «այո» աղաղակելով և դրա համար ստացել էին «էվէթաուսի» ծաղրանունը) — քրիստոնեայ պատգամաւորների ներկայութեամբ, նրանց հասցէին հնչում էր նախագահի վիրաւորական ֆրազը. «քրիստոնեաները պէտք է գոհանան այն համբերութեամբ, որ ցոյց է տրւում նրանց նկատմամբ»:

Ջարգացման անիւր այսօր փոքր ինչ առաջ է գնացել, բայց նոյն անվստահութեան ոգին է ցոյցում, տարաբախտաբար, նաև «կենտրոնական նացիօնալիզմի» այն սխտեմի մէջ, որ հաստատուել է յուլիսեան յեղափոխութիւնից ի վեր...

Ինչպէ՞ս տնօրինել այդպիսի դժուարին հանգամանքներում մեր կռիւը յանուն ճշմարիտ ռամկավարութեան ու միջազգայնութեան, — մի կռիւ, որի նպատակն է օսմանեան երկրի ճշմարիտ, իրական խաղաղութիւնը և որի գերագոյն նշանաբանն է. «Բոլոր ազգերի աշխատաւորներ — միացէք»...

Այդ կռիւը սկսւած է արդէն օսմանեան կայսրութեան մէջ: Նրա անունն է՝ աշխատաւորական կռիւ: Նա առաջ կերթայ զուգընթացաբար երկրի աստիճանական ռամկավարացման հետ, միշտ աճելով ու ծաւալւելով: Հին ըէփմի տակ նա չը կար: Խեղդւած էր դասակարգերի հակամարտութիւնը, ինչպէս խեղդւած էին կեանքի բոլոր արտայայտութիւնները: Բայց հէնց որ սահմանադրութիւնը ծանուցեց — բնորոշ և ուշագրաւ է այդ հանգամանքը — հէնց որ տարածեց «ազատութեան դիւթի» արձագանքը օսմանեան տարտարոսի մէջ՝ մէկէնիմէկ գահավիժող հեղեղների պէս պայթեցին բանւորական մասսային գործադուլները: Քրիստոնեայ ու մահմեդական ամեն կարգի աշխատաւորներ, տպարանային գործաւորներ, գրաշարներ, բեռնակիրներ, երկաթուղու և տրամվայի ծառայողներ, ծխախոտի, թղթի ու այլ գործարանների բանւորներ, հանքային պրօլետարներ — մին միւսի ետեւից, մեծ մասամբ ինքնաբերաբար, անկաղմկերպ, տարերայնօրէն բան թող հրատարակեցին, բեռնելով մի վայրկեան իրենց վրայ Եւրոպայի ուշադրութիւնը, ձգելով անակնկալի ու շարունակի տպաւորութիւնը մանաւանդ «երիտասարդ թիւրքիայի» իգէօլօգների վրայ, որոնք տասնեակ տարիների իրենց արեւմտեան թափառումների մէջ, դժբախտաբար, ոչինչ չեն սովորել նոր կարմիր, աշխատաւորական ինտերնացիօնալ շարժումներից և յաւակնում են անանցանելի պատենէլ դնել նրանց հանդէպ՝ օսմանեան հայրենիքում... Հակասիդիկատային ու այլ նման օրինագծերով: Իբրեւ լրացում այդ տարերային գործադուլների և իբրեւ նրանց ապագայ խթան՝ ահա բանում են մին միւսի ետեւից սինդիկատները, արհեստակցական միութիւնները, որոնք կը ծաղկեն նաև «մութի» մէջ, եթէ կառավարութիւնը հետևողականօրէն գործադրէ զսպիչ օրէնքները և թող չը տայ տնտե-

սական կազմակերպութիւններին՝ լոյս աշխարհ գալ: Սա մի պատկառելի սկզբնաւորութիւն է, որ կունենայ, անտարակոյս, իր պատշաճ զարգացումը, համաձայն տնտեսական ընդհանուր էօլիւցիայի օրէնքներին: Շարժումը կենտրոնանում է գլխաւորապէս եւրոպական թիւրքիայում, ուր նորագոյն արդիւնաբերութիւնը արդէն խոշոր բայլեր է արել և ուր բուլգար-մակեդոնական սօցիալիստ կազմակերպութիւնները տարիներից ի վեր մղել են միջազգայնութեան պրօպագանդը: Նոր շարժումը ընդգրկում է աշխատաւոր ընդհանրութեան դեռ մի չնչին մասնիկը, բայց տնտեսական զարգացման ու բաղաժանան բարեփոխումների հետ, նա կը տարածւի և կընդհանրանայ նաև ասիական Տաճկաստանում, նաև դաշտերում, աշխատաւոր գիւղացիութեան մէջ: Մի չնչին մասնիկն է դա այն մեծ հոսանքի — աշխատաւորական կամ սօցիալիստական մեծ ինտերնացիօնալի — որ ապագայում պիտի միացնէ իր մէջ — ձուլւած ի մի անյաղութելի բանակ — երեք հզօր դաշնակիցներ՝ հարստահարւած բանւորութիւն, հարստահարւած գիւղացիութիւն և գիտակից մտաւորականութիւն:

Ինչպէս Աւստրիայում, Ռուսաստանում և բոլոր ուրիշ երկրներում, այնպէս և մեզ մօտ, այդ հոսանքը միակ էական գրաւականն է ազգերի ու ցեղերի անկեղծ, անխարդախ մերձեցման, միակ յարատեւ շաղախը ազգամիջեան համերաշխութեան:

Աշխատաւոր լէգէօնների շահերի բնական եղբայրակցութիւնը պէտք է աճի՝ զուգընթաց արեւան եղբայրութեան հետ: Դասական դերի խաղաղ պայքարը պէտք է փոխարինէ նաև թիւրքիայում, ազգերի արիւնոտ բաղխումներին: Երբ նրա ծնունդ աշխատաւորական ինտերնացիօնալ իր գիրկը կը բաշէ մահմեդական աշխատաւորների գեթ փոքրիկ մասը, երբ նա կը գրաւէ նաև մի համեստ հատւածը թիւրքական մտաւորականութեան — այն ժամանակ այլևս դժար կը լինի յետագէժ տարրերի համար՝ դաւել այս կամ այն ժողովրդի դէմ, խառնել, պղտորել ազգամիջեան յարաբերութիւնները:

Բոլոր ազգերի ճնշւածներն ու կեղբււածները — բոլոր ազգերի ճնշողների ու կեղբւրողների դէմ... Միջազգայնութեան գաղափարը իր նորագոյն իմաստով հիմնւած է տնտեսական հաւասարութեան պահանջի վրայ: Չը կայ մարդկանց իսկական հաւասարութիւն ու եղբայրութիւն, բանի դեռ չը կայ այդ տնտեսական հաւասարութիւնը, քանի դեռ ազգերի ճնշող մեծամասնութիւնը կազմող աշխատաւոր մասսաները կը մնան լծի տակ կորացած, իրենց օրական պարէնը հայթայթելու անողորմ անհրաժեշտութեան մէջ:

Յանուն այդ հաւասարութեան, յանուն այդ միջազգայնութեան՝ պէտք է այժմից իսկ կատարւի բաղձալի

զան ազան աւորումը վերածնունդ Տաճկաստանում... Իդէալը, աւա՛ղ, իր լիակատար իրականացմամբ դեռ հեռու է. նա հեռու է նոյնիսկ առաջագէ՛մ ազգերի համար: Բայց այդ իդէալը բեկոր-բեկոր իրագործելու է այժմից արդէն:

Այժմից արդէն հայ գեւոգրատ, գաղափարական մտաւորականութիւնը պիտի դիրք բռնէ նոր սկսուող շարժման հանդէպ: Կամ կապիտալի ու շահագործման հետ՝ ընդդէմ աշխատանքի և ժողովրդի, կամ թէ այդ վերջինի հետ՝ ընդդէմ կապիտալի և ամեն տեսակ առանձնաշնորհումների:

Ինչպէ՞ս է, սակայն, պատկերանում մեզ՝ բուն գործնական շարժման հողը մեր յատուկ միջավայրում, թիւրքաց Հայաստանի մէջ: Ինչպէ՞ս զուգադրել երկու անհրաժեշտ ու լրացուցիչ գաղափարները—ազգայնութիւն և միջազգայնութիւն: Ինչպէ՞ս հաշտեցնել մեր հայկական ազգայնական դատը՝ բոլոր ճշւածներ ի ներկայիս դատի հետ...

Պատասխանը մասամբ արդէն տրւած է նախընթաց պատճառաբանութեան մէջ: Բայց փորձենք մի քիչ աւելի խորացնել այն:

Թ Ի Ի Ր Ք Ի Ա

Ա Ր Տ Ա Գ Ա Ղ Թ Ը

Լուրերը հետզհետէ կը խտանան, որպէս հսկայական ահաբանողանք և կը գուժեն մեծ աղէտը—աւելի մեծ քան 95-ի ջարդերը, աւելի ահաւոր քան Ադանայի սարսափները—ընդհանուր արտագաղթի սպանիչ տրամագրութիւնը: Եւ քանի մը գաւառներէն խմբերով չենլը ալիքաձև տարածելով դէպի հայաբնակ վայրերու ամեն մէկ խուլ անկիւն՝ երկիւղի ու սարսափի դռներ կը բանայ ամենուրեք: Ծայր յուսահատութիւնը գալիք օրերու նկատմամբ իբր մղձաւանջ կը ծանրանայ ամենքի կրծքին. բոլոր աղէխաբշ հառաչանքները՝ միացած անստոյգ մթնոլորտին՝ սովի, կոտորածի, լիկուծի, դրացու երկդիմի լեզւի և օդի մէջ պտտուող անխօս շշուկի ու սպառնալիքի բաօսին՝ սկիզբը որքան կցկտուր, տարտամ, վերջը նոյնչափ ձեւաւորւած՝ արհաւիրտ յանկերգը կը դառնայ, յուսահատին յատուկ յանկերգը—գա՛ղթ, գա՛ղթ:

Այդ տխուր յանկերգը ծայր կ'առնէ հայկական բարձր ձիւնագագաթներէն մինչև Մուշի հովիտները, Սասունի ըմբոստ ծերպերը, հպարտ Փր-Փր քարը, փոքր-հայրի մարուր աղբիւրները, մինչև Պիլիկիոյ արիւնաներկ դաշտերն ու Տաւրոսի անառիկները:

Ընդհանուր ճիշի մը մէջ, գաղթի արձագանքը կը թռչի շտապ դէպի Եւրոպա, Եգիպտոս, Ամերիկա, մինչև Արժանթինի հասարակապետութիւնը, ուր զարնւելով անհիւրընկալ ապառաժներուն, այս նիւթական դարու չորհրդանշան սրտին ու գահավիժելով կ'ընկրկի

կորագլուխ՝ դէպի ետ, դէպի զուլումի աշխարհը, դէպի յուսահատները, զանոնք պահ մը շարեցնելու, տարուբերելու աննպատակ սին երազներով իրենց օրրանին մէջ, որ յետոյ նորէն ուժեղ բռնկումով մը, աւելի անզուսպ, աւելի վճռական, մռնչէ ամբողջ աշխարհին—դէպի դուրս, հեռուն, դէպի ամեն տեղ, երբեք հայրենիք:

Ժողովրդական հոգեբանութեան այս ցաւագար գրութիւնը հասկանալի է Խորհող միտքը որքան և արիւննուի դժբախտ իրականութեան ելեւէջներու հանդէպ, այդ բոլորը բացատրելու մեղմացուցիչ հանգամանքներուն—ամբոխն է այդ, որ առօրեայ վտանգի ընդհանրապիւն դատելու, ուղիղ կշռելու անընդունակ կը դառնայ: Արիւնի հանդէպ անոր տեսութեան հօրիզոնը կը կորսնցնէ ջինջ գոյները, պահելով գորշ մշուշ միայն, որի մէջ ոչ մէկ լուսատու գիծ չի գտնուի: Ամբոխային մտածմունքն է այդ: Բայց երբ մայրաքաղաքը նստած ժողովրդական տրամագրութիւնը ղեկավարողները, մամուլի ներկայացուցիչներն են այդ թիրիմացութեան մէջ ընկնողները, երբ անոնք մէկ յօդաւորով գաղթը կը պարսուեն և միևնույն կը քաջալերեն, այդ արդէն աւելի քան յուսահատական է: Եւ ցաւալի է որ յեղափոխական օրգանը ստիպւած է ոչ միայն ժողովրդական հոգեբանութեան սխալ մօմենտները հրապարակ հանել, այլ և այն մամուլի, որ ժողովրդի մտաւոր մակարդակէն բարձր չի խոյանար և յաճախ անոր սխալները կը կրկնէ: Եւ ո՞վ կարող է ըսել, թէ թերթի մը քաջալեր մէկ տողը գաղթի նկատմամբ ժողովրդական յուսահատութիւնն ու գաղթի տրամագրութիւնը իր գրգռումին չի հասցնել: Ժողովրդական ամեն մէկ սխալ բայլ ունի իր բացատրութիւնը, բայց մամուլի սխալը աններելի է:

Գուցէ ոմանք ուզեն այդ վարմունքը արդարացնել, բացատրելով թէ գաղթի ջատագովը՝ մամուլի մէջ՝ ըստպառնալիք մըն է կառավարութեան, զայն զգաստացնելու, սթափեցնելու, իր երկիրը շինարար ժողովրդէ մը թափուր դարձնելու հեռանկարը անոր ցուցադրելով, բայց այդ մտածմունքն իսկ շատ է թերթէ:

Ըսել մամուլի մէջ, թէ հրապարակագրի ձայնը անգոր է կասեցնել մի հոսանք, որ հետեւանք է կեանքի վատթար պայմաններու, անստոյգ ապագայի, թէ կանչն ու յորդորը դատարկ ձայներ են այնտեղ, ուր ժողովրդական տրամաբանութիւնը կը թերադրէ հակառակը, կը նշանակէ չըմբռնել հրապարակախօսութեան այն մեծ դերը, որ ան կը խաղայ այսօր ամբողջ քաղաքակիրթ աշխարհին մէջ, կը նշանակէ ուրանալ անոր կշիռը և նշանակութիւնը: «Մամուլը 6-րդ պետութիւնն է» խօսքը դատարկ ֆրազ չէ գեղեցկախօսութեան համար արտայայաւած:

Պօլսոյ հայ մամուլն էր, որ այնչափ աղմուկ բարձրացուց Արանա հրատարակող «Իթիտալ» թերթի և անոր խմբագիր Հասան Ֆիքրիի դէմ, լաւ ըմբռնելով թէ որչափ ազդեցիկ դեր կը խաղայ մամուլը ժողովրդի հոգեբանութեան վրայ, զայն դէպի ոճիր առաջնորդելու սև գործին մէջ:

Պօլսոյ ներկայ միլիտարական տագնապը—նորատունկեան հարցին մէջ—միայն և միայն «Թանինի» յօդաւորներով կը բացատրուի:

Այս օրինակները բաւական են մի ընդհանուր մտածել տալու մի շարք հայ հրապարակագիրներուն՝ գրելէ

առաջ ճանչնալ գրչի ուժը և ըստ այնմ արծարծել մի գերագոյն կարևոր խնդիր, ինչպիսին է արտագաղթը: Խօսել արտագաղթի մասին այնպէս, ինչպէս երբեմն կ'արձանագրեն հատուածական պանդխտութեան, ժամանակակոր տարագնացութեան մասին, դուրս գալ Ամերիկա պանդխտած հայ երիտասարդներուն կորովն ու ջանքը՝ իրենց ապրուստը հայթայթելէ զատ, հեռաւոր հայրենիքի մէջ իրենց ծնողներուն նիւթական նպաստ հասցնելն ու ասկէ եզրակացութիւն—թէ ընդհանուր արտագաղթն ևս մի առանձին կորուստ չէ հայութեան համար, սա արդէն ողջմտութեան բացասումն է:

Ամբողջ մի ժողովուրդ տեղահան ընել իր հայրենիքէն և տանել թէկուզ ամենաերջանիկ մէկ աշխարհ, ուր թէ բնութիւնը և թէ դրացիները մեզ ժպտային անկեղծ ու անխաղախ ժպտով, ինչը կերաշխաւորէր մեզ թէ այդ ժողովուրդը կը մնար նոյնը առանց վտանգելու իր էականը—իբր ինքնատիպ հայութիւն:

Եւ շատ տարօրինակ պիտի ըլլար, եթէ տեսնէինք բոլոր հայերը միասին գաղթած Վիլիկեան սարսափներէն վերջ, մինչ նոյն հայութիւնը իր գերազանց մեծամասնութեամբ այդ սխալ ճամբան բռնել չը մտածեց 95-ի ընդհանուր քարոզէն անմիջապէս յետոյ, որ իր հետեանքներով շատ աւելի աղէտաբեր էր:

Հրապարակագիրներէն ոմանց այսօրւայ վայնասունն ու արտագաղթը ներող յօգւածները մեզ ենթադրել կուտան, որ եթէ 95-ին նոյնչափ ազատ մամուլ ըլլար Թիւրքիոյ մէջ, ինչպէս վերջերս էր, ինքնաբերաբար գաղթել չուզող հայ ժողովուրդը մեր հրապարակագիրները իրենց ձախաւեր պրօպագանդով մինչև այժմ իսպառ գաղթեցուցած պիտի ըլլային—իրենց երևակայութեան մէջ—այնչափ մեծ պիտի ըլլար արտագաղթի կոչը անոնց կողմէն:

Ժողովրդական բնազդը, ոչ առօրեայ գոյութեան բնազդը, այլ անոր ապագայ բարօրութեան, շատ հեռուն է, շատ ապագայէն կը խօսէ նոյն ժողովրդի սրտին:

Հայ ժողովուրդը անյիշատակ ժամանակներէն շատ սուղ գնով ու յիշատակներով է կապւած իր հողի հետ, շատ աւելի վայրենի ցեղեր ու ժողովուրդներ է անցուցեր իր կեանքի կամուրջով և ամեն անգամ իր յամառ դիմացկանութեամբ նորէն ուժ է առեր ուրիշ աղէտ մը—աւելի վայրագ ու կոպիտ—դիմագրաւելու աստիճան:

Ան շատ է կոպիւր, կարծածէն շատ աւելի, անոր հոգին շատ է մարզւեր երևակայածէն ալ աւելի՝ զգալու և համոզւելու համար թէ, ինքը դեռ ապրելու է աւելի երկար ու աւելի բեղմնաւոր կեանք քան ոճիւրը, որի մէկ տխուր ժեստը այսօր կը սարսափեցնէ հայ «հրապարակագիրը»:

ՔԱՂԱՔԱԿԱՆ ՏԵՍՈՒԹԻՒՆ

ՀԱՄԱԺՈՂՈՎՐԴԱԿԱՆ ԲԱՆԱԿ

III

Միլիտարիզմը, այդպիսով, չարիք է նոյնքան ներքին, որքան և արտաքին խաղաղութեան համար: Նա աւերում է ժողովուրդների տնտեսութիւնը, հարւաճում է ամենաաղքատ, աշխատաւոր խաւերին, որոնք

առանց այն էլ տնքում են ամենուրեք բիւրօկրատական, կապիտալիստական, վաշխառուական ու այլ ձևի հարստահարութեան տակ: Զօրքերի ու նաւատորմերի բիւջէն բոլոր խոշոր պետութիւնների մէջ կազմում է սովորաբար ընդհանուր բիւջէի ծանրութեան կենտրոնը: Անգլիայի, Գերմանիայի, Ֆրանսիայի պէս պետութիւնները առայժմ դեռ կարողանում են դիմանալ կանգուն բանակների ու յարածուն զինաւորութեան ծախքերին, քանի որ այդ երկիրները համեմատաբար հարուստ են, արդիւնաբերութիւնը ճոխ ու արգասաւոր և ազգային բարօրութեան ընդհանուր մակերեւոյթը համեմատաբար բարձր: Այնուամենայնիւ, նոյնիսկ այդ հարուստ պետութիւնների մէջ, աշխատաւոր ընդհանրութիւնը չափաւոր տուժում է միլիտարիզմի ծայրայեղութիւններից: ապացոյց՝ հակամիլիտարական այն ահագին հոսանքը, որ ստեղծւել է այդ երկրներում և որի առջև ժողովուրդների հրամանատարները վաղ թէ ուշ ըստիպւած կը լինեն գլուխ խոնարհեցնել:

Որքան աւելի զգալի է միլիտարիզմի աւերածը տնտեսապէս ու կուլտուրապէս յետամնաց երկիրներում, քանի՞ անգամ Իտալիայի, Սպանիայի ժողովուրդները արիւնալի ընդվզումներով փորձել են մեղմացնել այդ պատուհասը... Դեռ երէկ հերոսական կատալոններ, որպէս մէկ մարդ, ծառացել էր հայրենի դաւաճան կառավարութեան դէմ, որ ի հաշիւ իր ժողովրդի ստրկութեան ու տառապանքների՝ մղում էր ամօթալի պատերազմներ ֆրիկական Մարօկկոյում: Առայժմ, աւա՜ղ, այդ ազնիւ ըմբոստացումները խեղդում են ժողովրդագական արեան մէջ—նոյն բթացած ու կամազուրկ զինւորների բազուկներով—բայց կը գայ ժամանակ, երբ աշխատաւոր զանգւածների մի ժեստը միայն բաւական կը լինի՝ ժողովրդասպան պատերազմները արգելելու, կանխելու...

Իտալիայից և Սպանիայից յետոյ—Ռուսաստանը և Թիւրքիան: Թէ որքան ծանր է միլիտարիզմի բեռը ցարերի կայսրութեան մէջ, երևում է պետական բիւջէից, նրա բաշխումից: 1906 թւի վիճակագրութեան համեմատ՝ զօրքի ու նաւատորմի վրայ ծախսւում է մօտ 500 միլիոն ռուբլի. մի գումար, որ կազմում է ընդհանուր բիւջէի բաւոր դր. Դեռ այդքանով, ի հարկէ, չեն սահմանափակւում ռուս ժողովրդի տնտեսական զոհաբերութիւնները՝ միլիտարական խորանին: Հաշւեցէք, թէ որքան բեղուն, արգասաւոր աշխատանք են կորցնում այդ միլիոնաւոր ժիր ու առողջ երիտասարդները, որոնք ծաղիկ հասակի մէջ խլւում են իրենց չքաւոր ընտանիքներից...

Զինաւորութեան խելագար ծախքերը «սխմում են», բնականաբար այդ թշուառ երկրների զուտ կուլտուրական պէտքերը և նախ և առաջ՝ լուսաւորութեան գործը, դպրոցները, գրագիտութիւնը: Սխմում են նրանք՝ թէ կառավարութիւնների և թէ նոյնիսկ աշխատաւոր ազգաբնակչութեան կողմից: Իրենց անծայր խեղճութեան մէջ ժողովրդային զանգւածները այդ երկրներում ոչ մի հնարաւորութիւն չունին հոգալու իրենց զաւակների ուսման պէտքերը. և մենք տեսնում ենք, որ եւրոպական պետութիւնների շարքում, Թիւրքիայից ու Ռուսաստանից յետոյ, Իտալիան այն երկիրն է, ուր տգի-

տուժիւնն ու անգրագիտութիւնը շեշտուած են ամենահաճելի չափերով *):

Աւերիչ՝ անտեսութեան համար, աւերիչ՝ կուլտուրայի ու մտաւոր առաջադիմութեան համար, մշտնջենական սպառնալիք՝ ներքին ու արտաքին խաղաղութեան համար:

Ներքին խաղաղութիւնը վտանգուած է ոչ միայն զինուորական միջամտութիւններով՝ կապիտալի ու աշխատանքի պայքարի. ոչ միայն միլիտարիզմը իր կանգուն բանակներով և կաստային զօրասիստեմով պատրաստ է միշտ միջամտելու աշխատաւորական, գործադուլային ու այլ տեսակ շարժումների մէջ, ոչ միայն նա պատրաստ է միշտ ճնշել ու ջարդել աշխատաւորին ի նպաստ կապիտալի ու գործատիրոջ, այլև նա միշտ ընդունակ է քաղաքական պատուհասներ բերել ժողովրդի գլխին, սադրել «պետական հարածներ» (coups d'état) ու վերիվայրուներ... յօգուտ, ի հարկէ, ոչ ժողովրդի, ոչ աշխատող ու տառապող ընդհանրութեան, այլ յօգուտ մի արտօնեալ փոքրամասնութեան, մի կաստի, դասակարգի...

Դա մի իրական սպառնալիք է, որ կապած է միլիտարիզմի էութեան հետ: Ֆրանսիական պատմութեան վերջին տասնամեակը պերճախօս կերպով ցոյց տւեց այդ: Տեսանք դրէյֆուսեան փոթորկալի դատի միջոցին, թէ ինչպէս զինուորական բարձր առաջնորդները, գրեթէ ամբողջ սպայակոյար (état-major), վարակած մինչև ուղ ու ծուծ յետադիմական գաղափարներով, թէ էր տալիս հակահանրապետական խաժամուժին—կղերականներին, նացիօնալիստներին ու արքայականներին—կուռումբ ազատութեան ու արդարութեան դէմ, ցինիկօրէն դժբախտ էր ֆրանսիայի լաւագոյն աւանդութիւնները և պատրաստ էր ենթարկելու հանրապետութիւնը ամենահաւոր փորձութիւններին:

Չարիք—ըստ ամենայնի...

Ինչպէ՞ս գարմանել... Ինչպէ՞ս վերացնել, կամ գէթ մասամբ թեթեւացնել ժողովուրդների մէջքի, սրտի և ուղեղի վրայ ծանրացած այդ սարսափելի բեռը: Ի՞նչ միջոցով կարելի է կանխել պատերազմները և սահմանափակել զինուորումի այդ համաճարակ ու կատաղի տենդը: Սա ամենացաւոտ ու առաջնակարգ կնճիռներից մինն է, որ զբաղեցնում է քաղաքակիրթ մարդկութիւնը:

Երկու լուծում կայ:

Մէկը գալիս է «բարձր», իշխող դասակարգերից: Միւսը գալիս է ժողովրդից և նրա պաշապան ռամկավարական կուսակցութիւններից:

Առաջինը ձգտում է գլուխ բերել ընդհանուր զինքն կեցութիւն (desarmement) կամ զինաւորման սահմանափակում: միջազգային համաձայնութեամբ, իրաւախոհութեամբ: Այդ ձգտումը ստացաւ մի տեսակ պաշտօնական նւիրագործում 1899 թւին,

*) Մի փոքրիկ աղիւսակ. Շվեյցարիայում ամեն մի 1000 բնակիչներից բնդամներ 6-ը աւագ է են, Դեմմաիայում 1000-ից 21, Անգլիայում 24, Ֆրանսիայում 35, Աւստրիայում 327, Իսպիայում 1000-ից 529 անգրագէտ են: Չեռի սակ չունի՞մ Ռուսաստանի քւերը, բայց յամենայն դէպս ցրանք անելի խոռո են, Բան Իսպիայից: Թիւրքիոյ մասին խօսել իսկ չարժէ:

երբ աշխարհի ամենահզօր ինքնակալներից մինը, Նիկոլա II հրատարակեց իր արտառոց մանիֆեստը համաշխարհային զինաթափութեան մասին: Տեղի ունեցաւ Հաագի պատմական խորհրդաժողովը: Պետութիւնները, ի դէմս իրենց ամենաձեռնհաս ներկայացուցիչների, գումարեցին Հօլլանդիայի մայրաքաղաքում և ամիսներ շարունակ խորհեցին: Արդիւնքը... Հէնց նոյն տարւայ մէջ պայթեց անգլո-տրանսվալեան պատերազմը... Իսկ մի քանի տարի (յետոյ) կեղծութեան գլուխգործոցը մերկացաւ իր բովանդակ այլանդակութեամբ սեփական միջավայրում, նոյն իրեն նախաձեռնողի մօտ... Առաջ եկաւ ռուս-եռապօնական պատերազմը...

Աշխարհը տեսաւ, որ խաղաղասիրութեան ու միջազգային համերաշխութեան անունով խաղացուած է մի անարժան կատակերգութիւն, որ այդ տեսակ բանակ-ցութիւններով պատերազմները չեն վերանայ, զինուորականները չեն նւազի, միլիտարիզմը չի թուլանալ: Ընդհակառակը. «բարեկամական», մեղմանոյշ զրոյցներից յետոյ իւրաքանչիւրը շարունակում է աճեցնել ծովի ու ցամաքի իր ուժերը: Անգլո-գերմանական հակամարտութիւնը մի նշանախեց անգամ չը պակասեց Հաագի երկու կօնգրէսներից յետոյ, ընդհակառակը՝ աւելի թափ առաւ, և այսօր երկու ախոյեանները կատաղօրէն մրցում են իրար հետ՝ զրահանաւորի շինութեան մէջ... որովհետեւ գերմանական բուրժուա ու ֆէօդալ դասակարգերին հաճելի է՝ ծաւալել իրենց տիրապետութիւնը տիեզերական ջրերի վրայ, համաձայն կայքերի ռազմակոչին. «Unsere Zukunft auf dem Wasser!» (Մեր ապագան ջրերի վրայ է) և որովհետեւ միւս կողմից էլ Անգլիային ցանկալի է անխախտ պահել «ծովերի միահեծան թագուհու» իր պատմական, տիեզերական հմայքը:

Ուրիշ հակամարտութիւնները ևս չը թուլացան Հաագից յետոյ, այլ միայն շեշտեցին. բռնակալների և պրօֆէսիօնալ դիւանագէտների բերնով հռչակած խաղաղութիւնը աւազի վրայ կառուցւած մի շէնք էր, խարխուլ ու երերուն. նա ամեն վայրկեան պատրաստ է փլել:

Կայ և բուրժուա-ռամկավարական խաղաղասէրների ընդհանրապէս համակրելի տարրը, որ բոլոր երկրներում եռանդով պրօպագանդ է մղում խաղաղութեան ու ազգերի համերաշխութեան մասին, ունի իր տարեկան համագումարները, իր մամուլը, ունի և կենտրոնական միջազգային իր բիւրօն Էվէյցարիայի Բերն քաղաքում: Ինքնին օգտակար ու համակրելի մի հաստատութիւն, որ քարոզում է, երբեմն նոյնիսկ աջողեցնում է միջպետական մանր կնճիռների խաղաղ հարթումը իրաւարար ատենանների միջոցով, սակայն, ազդու և վճռական գործօնի դեր միլիտարիզմի ցաւոտ հարցերում՝ չի կարող խաղալ նաև այդ անպաշտօն, բուրժուա-ռամկավար խաղաղասէրների ինտերնացիօնալը:

Երկրորդ լուծումը—բուն ու ամ կապարականն է: Նրա միջօնաւոր կողմնակիցների մէջ կան, ի հարկէ, բուրժուազիայի ձախակողմեան, դեմօկրատ տարրերից, բայց նրա հզօր ու հետեողական փաստաբանն են բոլոր երկրներում՝ սօցիալիստական կուսակցութիւնները, Միջազգային Ուշխատաւորական Միութիւնը— Ի ն տ եր ն ա ց ի օ ն ա լ ը Վերջինը այնքան արդէն ուժեղ է իր թւով ու ազդեցութեամբ, որ այժմից իսկ կարողանում

է զգացնել տալ իր թափը միջազգային բարդութիւններէ կշռի վրայ, կարողանում է երբեմն—իր կորովի սպառնալիքներով, պարլամենտական միջամտութիւններով ու հրապարակական վանգաճային ցոյցերով—աւելցնել իրեն պատերազմներին: Ֆրանսիական սօցիալիզմն էր, որ վերջին երկու տարւայ ընթացքում, Մարոկկոյի ճգնաժամի միջոցին, զսպեց հայրենի կառավարութեան և ռազմատենչ բուրժուազիայի ախորժակները, յուզեց շարունակ հասարակական կարծիքը և կանխեց շատ արեւնալի արկածներ: Եւ երբ անցեալ տարւայ ընթացքում, անգլո-գերմանական յարաբերութիւնները հասել էին հակամարտութեան ու լարման գագաթնակէտին, երբ միջոցորդը ելքերականացել էր և սոցիալիստ կուսակցութիւններն էին, որ հնչեցրին ամենազգու «հաւաճ» երկու երկրներում: անգլիական սօցիալիստները փոխադրեցին Բերլին, գերմանական սօցիալիստները իրենց հերթին գնացին Լոնդոն և երկու մայրաքաղաքներում կատարած թափօրների, սօցիալիստական անգլո-գերման եղբայրակցութեան ցոյցերի մէջ՝ կառավարութիւնները նշմարեցին աշխատւոր զանգաճների հրահանգիչ սպառնալիքը...

Ինչ ահաւոր նախազգուշացումն էր նոյն բուրժուա ու աւատական դասակարգերի ու կառավարութիւնների համար՝ Սպանիայի, Կատալոնի վերջին ցնցող անակնկալը... Այդ հազարաւոր ապստամբները, որոնք բողոքելով շղթայազերծւած պատերազմի դէմ, պարզում էին ընդհանուր գործադուլի ու սօցիալական ազատագրութեան կարմիր դրօշը, գնում էին գնդակների տարափի տակ քանդելու բռնակալութեան, կղերի ու բուրժուազիայի պատւարները—դա «պարիզեան Կոմմունայի» յետոյ ամենածանր, ամենաարհաւիրի դասն է որ չի կարող մտածել չը տալ աշխարհի ռազմասէր հրամանատարներին...

Բոլոր «խաղաղասէր» հոսանքներից սօցիալիզմը ամենախրականն ու զօրաւորն է, բոլոր դիմադրական հատկանքների շարքում՝ սօցիալիստական կուսակցութիւնը ամենաազդուն է միջազգային քաղաքականութեան ծանրակշիռ խնդիրների մէջ, որովհետեւ նա ունի իր ետեւում անձնագոյ մարտնչողների բազմամիլիոն զանգաճներ, որոնք կարող են պատերազմի միջոցին մի օր վերջապէս, ծառանալ յաղթականօրէն ժողովրդի բոլոր այլազան ոսոխների դէմ և խաւարեցնել միանգամ ընդմիշտ բռնակալութեան ու կապիտալիզմի արեգակը...

Ինչ է քարոզում այդ հոսանքը միլիտարիզմի դէմ: Նա դաւանում է այն համոզումը, որ պատերազմը ժամանակակից քաղաքակրթութեան մէջ բղխում է կապիտալիզմի ընթացքից, որ միջազգային բարդութիւններին սովորաբար խթան են լինում իշխող դրամատէր դասակարգերը, որոնք ձգտում են միշտ նորանոր հողեր գրաւել երկրագնդի խուլ ու խոպան անկիւններում, ձգտում են ըստ կարելւոյն ընդլայնել իրենց «գաղութային» տիրապետութիւնը, որպէսզի հնար ունենան արտահանելու, սպառելու իրենց յարածուն արդիւնաբերութեան լեռնացած արդիւնքները:

Պատերազմը կապիտալիզմի անբաժան ստւերն է և կը վերանայ վերջնականապէս միայն այն ժամանակ, երբ կը փլատակի կապիտալիզմի բովանդակ շէնքը, երբ

մասնաւոր սեփականութեան ու դասակարգերի անհետացման հետ՝ կ'անհետանան ժամանակակից հասարակութեան բոլոր աղաղակող անիրաւութիւնները:

Այդ համոզումը, սակայն, չի թելադրում իր դաւանողներին՝ սպասել ձեռնածու, կրաւորական դիրքի մէջ, մինչև կապիտալիզմի փլատակումը: Նրանք կուզում են պատերազմի ու միլիտարիզմի դէմ այժմից իսկ: Նրանք ձգտում են—արդէն ներկայ բուրժուազական կարգերի մէջ—մտցնելու, իրագործելու այնպիսի հիմնական բարենորոգումներ, որոնք պէտք է առաջնորդեն, որպէս անհրաժեշտ հանգրուաններ, դէպի ճշմարիտ միջազգային խաղաղութիւն ու համերաշխութիւն:

Սօցիալիստները այժմից արդէն չեն պահանջում ազգերի զինաթափում: Նրանք ուսուցիստ երազողներ չեն, անիրագործելի ցնորքների ետեւից ընկած: Նրանք ընտրիստ, իրապաշտ մարդիկ են, որ փնտրում են իրագործելին: Նրանք գիտեն յարմարել ժամանակի ու տարածութեան պահանջներին, գիտեն որոշ չափով համակերպել իրականութեան անողորմ անհրաժեշտութիւններին:

Իրականութիւնը, աւա՛ղ, դեռ հեռու է այն ոսկէ դուրից, երբ գայլն ու գառը մէկտեղ կ'արածեն, երբ մարդ-գայլերը կարող են ապրել իրենց նմանների հետ խաղաղ դրացիական կենցաղի մէջ, առանց իրարու հետապնդելու և բզկտելու: Իրականութիւնը — անգամ քաղաքակիրթ, ամենաառաջագէմ իրականութիւնը — տակաւին լեցուն է յոռի, մարդասպան, պատերազմատենչ բնազդներով, որոնց հանդէպ խաղաղասէր ժողովուրդները պիտի մնան միշտ՝ զգաստ ու աչալուրջ հսկողի դիրքում, եթէ չեն ուզում անդունդ գնալ և անդունդ գլորել քաղաքակրթութեան բովանդակ շէնքը: Ո՛չ, ազգերը չը պէտք է զինաթափին: Գարշելով հանդերձ ժողովրդասպան պատերազմներից, ատելով հանդերձ վառօդի հոտը, ժամանակակից ռամկավարութիւնը, սօցիալիզմը պատրաստ են, այնուամենայնիւ, սպառազինած կուլի դաշտ ելնել, հէնց որ ծայր կը տայ հօրիզոններից աշխարհակալող ու բռնաւոր պատերազմի ուրակները, հէնց որ խաղաղ, կուլտուրական հայրենիքը կ'ենթարկուի յարձակման վտանգի:

Ժողովուրդները չը պէտք է զինաթափուին: Եւ ի՞նչ է անգէն ժողովուրդը ժամանակակից աշխարհում: Մի ողբալի փալաս, մի անձար ու զզւելի խամաճիկ, որին բռնաւորները—գրսից կամ ներսից—կարող են միշտ թելադրել իրենց անսանձ քմահաճոյքը:

Ա՛հ, երանի բոլոր ազգերը, բոլոր մանր կուլտուրական համայնքները վաղուց արդէն, իրենց գոյութեան խանձարուրից իսկ իւրացնէին ճակատագրի այդ անողորմ հրամայականը, երանի՜ թէ ըմբռնէին նրանք իսկզբանէ աշխարհի հզօր, արիւնապարտ այն օրէնքը, որի համեմատ Ուժը, բիրտ, կոպիտ ուժը քայլում է միշտ իրաւունքի առջև, պայմանաւորում է այդ իրաւունքի առաջնադասութիւնն ու յաղթանակները և հաղորդում է ժողովուրդներին այն անհրաժեշտ փայլն ու հմայքը, առանց որոնց՝ նրանք տեղ չունին, տարաբախտաբար, աշխարհի ճոխ ու լիառատ սեղանի շուրջը:

ԵՐԿՈՒ ՅԻՍՆԱՍԵԱՎ

Տասնիններորդ դարի ամենանշանաւոր ու ամենաարտառուշ քաղաքական վիպերգութեան—Իտալիայի ազատութեան— տօնն է տօնուում: Չքնաղ արտայայտութիւնը այն մեծ, տիեզերական գաղափարների, որոնք ծնունդ առան տասնութ-երորդ դարի վերջում և որոնք մի գեղեցիկ ծաւալումով լցրին տասնիններորդ դարը ամբողջապէս:

Ֆրանսիական Մեծ Յեղափոխութեան կտակած սկզբունքները խաղաղութեամբ ու հանգստով ընթացքով չէին իրագործուում: Եւրոպայի մէջ Պաշտպանողականութեան և բռնակալութեան վատթարագոյն ներկայացուցիչները միացան Աւստրիայի մայրաքաղաքում և կազմեցին նզովեալ «Սրբազան Գաշնակցութիւնը», որի միակ նպատակն էր ճնշել ազատութեան և արդարութեան ամեն ազնիւ ճիգը, ամեն վեհանքն շունչի Գազանացած Մետերնիխի բերանով Իտալիան յով «աշխարհագրական անուն» յայտարարեց. կռիւ սկսեց բոլոր այն ժողովուրդների դէմ, որոնք հաւատարիմ պատմական Մեծ Իրողութեան աւանգած ներշնչումներին՝ չէին կարող ու չէին կամենում հանդուրժել «վատ հովիւներին» լուծը...

Ազգութիւնները՝ տգէտ ու իմաստակ արհամարհանքի ենթարկեցին. ազգային, ցեղային, լեզական բոլոր կապերը ամենավարագ հալածանքի առարկայ դարձան: Պետութիւնների քաղաքական և իրաւական սահմանները գծելիս՝ «վատ հովիւները» անգիտացան ազգագրական համախմբումներին տեսակէտը և առաջ տարան մի ցաւագար ու ապուշ եռանդով «եւրոպական հաւասարակշռութեան» վտանգաւոր ու բռնաբարող քաղաքականութիւնը: Ազգերը — գերմանացի փիլիսոփայ Ֆիխտեի պատկերաւոր արտայայտութեամբ — հասարակ իրեր դիտուեցին և նետուեցին կշեռքի այս կամ այն նժարը «եւրոպական հաւասարակշռութեան» գոյացնելու համար:

Այս տարօրինակ և վատառողջ հասկացողութեան զոհ դարձան նաև Իտալիան՝ անկամայ ենթարկւելով Հաբսբուրգեանների անիրաւ տիրապետութեան: Մետերնիխի դիւալին խելքը աւելի անարգական ու աւելի խայտառակ իրողութիւն չէր կարող ստեղծել...

Ազգերը ընդհանրապէս և Իտալիան մասնաւորաբար չկամեցան, սակայն, հաշտւել «Սրբազան Գաշնակցութեան» դժնդակ արարքի հետ: Եւ սկսեց գեղեցիկ ու երազական պայքարը Ժողովուրդն երբ և կա ու վա-ր ու թիւնն երբ միջև. ծաւալեց հերոսական ու յուզիչ ճակատամարտը բռնաբարւած ազգութիւնների և բռնակալ պետութիւնների միջև...

Հասարակութեան աւելի գիտակից, աւելի զգայուն և աւելի գաղափարական տարրերը հիմք դրին մի առաքինի և վսեմ գործունէութեան, որ առաջ էր տարւում գաղտնի ընկերակցութիւնների մէջ, որ տալիս էր բազմաթիւ օրինակներ ազնիւ ըմբոստութեան ու վեհ զայրոյթի... Իտալիան, գեղեցիկ, սքանչելի մնացորդը հռոմէական նախկին հանրապետութեան, կտոր կտոր էր, բաժան-բաժան և ստրուկ Վիեննայի արքունիքին: Անհրաժեշտ էր միացնել Մեծ Աշխարհի, տիեզերական պետութեան այդ առեւանգւած զաւակը, պէտք էր մի վսեմ ու յողթական շարժումով յետ մղել վատթար թշնամուն, որի լուծը արւէն անտանելի էր դարձել պատմական թերակղզու ազատասէր ժողովրդի համար:

Տեղի ունեցան ապստամբութիւններ և ժողովրդական շարժումներ զանազան ժամանակներում: Անցած դարի 20-ական թւականներին, Վիեննայի դիպլոմատիական հաւաքումից հազիւ քանի մի տարի յետոյ՝ գաղտնի ընկերակցութիւնները ազատութեան առաջին փորձն արին: «Սրբազան Գաշնակցութիւնը» զօրեղ էր տակաւին. յեղափոխական գաղափարը նոր էր խեղդած բովանդակ եւրոպայում: Եւ քաջարի ազատականները չկարողացան յաղթականօրէն պսակել իրենց գործը: Բռնակալների միութիւնը յաղթեց ապստամբւած Իտալիային:

Այնուհետև այս երկրի շարժումները, ազգային, հայրենասիրական բռնւն արտայայտութիւնները մի գեղեցիկ ներ-

գաշնակութեամբ զուգորդեցին Եւրոպայի զանազան մասերում և ամենից առաջ Ֆրանսիայում տեղի ունեցած ժողովրդական, սահմանադրական, յեղափոխական շարժումներին: 1830 թւականի յուլիսեան յեղափոխութեան արձագանքները տարածեցին—ուրիշ երկրների հետ միասին— նաև Իտալիայի վրայ: Մարտնչող երիտասարդութիւնը գլուխ բարձրացրեց, աւստրիական ճնշող լուծը թօթափել կամեցաւ, դիւցազնական մենամարտը ծայր աւեց թերակղզու զանազան վայրերում, վիրաւոր հայրենասիրութիւնը՝ միացած Մեծ Յեղափոխութեան անմոռանալի սկզբունքներին — շարժման մէջ մտաւ... Այս անգամ էլ սակայն ամեն ինչ թաղւեց արեան և միտքների մէջ: Պայքարող բազուկը խորտակեց և երկիրը նորէն սկսեց յղացումի և ստեղծագործութեան գաղտնի, հալածական առաքինութիւնը: Ազատութեան և հայրենիքի արդար գործը սպանեց սյուսեղ, Ապենինեան բարձրութիւնների վրայ. սպանեց նաև այնտեղ, Վիտլայի ափերում, Վեհաստանի երկրքի տակ: Մի տեղ Հաբսբուրգեան անարգ թուրք, միւս տեղ Ռօմանօյների անիրաւ սուրբ վերջ դրին մարտնչող ժողովուրդների մաքուր, վսեմ դատին...

Եւրոպական հարթութեան վրայ—մի քանի բախտաւոր բացառութեամբ—այս թւականի յեղափոխութիւնից յետոյ ևս ծաւալեցին յետաշարժման և հակահարածի (réaction) սև թեւերը: Տարիներ անցած՝ 1848 թւականի քաղաքական և հասարակական յեղափոխութեան հետեանքները երևացին նաև մարտի ու պայքարի այս անընկալն ու գերահրաշ միջավայրում: Ազգաբնակչութիւնը աւելի պատրաստ էր, յեղափոխական գաղափարները այս անգամ աւելի հասունացած էին, աւստրիական պետութիւնը կազմով միւս մասերում ևս ընդգիմադիր շարժումներ էին ծայր տել: Թւում էր թէ այս անգամ, այնքան դիւցազնեցութիւնից յետոյ, Իտալիան պիտի հասնի իր վաղեմի, իր միակ նպատակին: Շարժեց Վենետիկը, խորտաց ամբողջ Լոմբարդիան, առաջ խաղացին թերակղզու միւս մասերը — սակայն այս անգամ ևս անկարելի եղաւ ձեռք բերել այն թանկագին, ցանկալի ազատութիւնը, առանց որի ժողովուրդների կեանքը չունի ոչ մի հրապոյր, ոչ մի հմայք: Պատմութիւնը ասես կամենում էր մի եղբրական օրինակով ապացուցանել այն դառն ճշմարտութիւնը՝ թէ ազատութիւնները և հաւաքական արդարութիւնները ձեռք են բերւում երկարամտայ ու յամառ աշխատանքի գնով, թէ ժողովուրդները, ստրուկ, անիրաււած ազգերը պիտի անվերջ ու անդուլ կռիւներով նւաճեն իրենց անկախութիւնը:

Մի տասնամակ ևս և Իտալիան կամաց-կամաց, բայց հաստատուն քայլերով մօտենում է տարիների պարտութիւնների մէջ իր երազած յաղթանակին: 1859 թւականը անընջելի կը մնայ Իտալիայի պատմութեան կարմիր էջերում: Նա չի մոռացել և յիշատակել քաղցրութեամբ կը յարատեի նաև ընդհանուր պատմութեան երեսների վրայ, իբրև գաղափարի և հերոսական անձնագոհութեան մի պատկառելի յաղթանակ, իբրև ազատութեան և արդարութեան մի հրաշալի պատկաւորում, իբրև հրահանգիչ, խրախուսական և քաջալերող վէպ բոլոր այն ազգերի համար, որոնք մարտնչում են յանուն նոյն սկզբունքների ուրիշ աստղերի տակ և ուրիշ բարձունքներում...

Իտալիայի ազատութիւնն ու անկախութիւնը մի քանի ուժերի և գործօնների հետեանք է: Ամենից առաջ պէտք է յիշատակել այն ընդհանուր, համատարած միջնորդողը, որ առաջ եկաւ Եւրոպայում՝ յեղափոխութեան մեծ սկզբունքների շնորհիւ: Մարդը և ազգը ազատ հռչակեցին և նրանց իրաւունքները անբռնարարելի: Այս գաղափարով էր ապրում և շնչում դարը և դարի որդին առհասարակ: Ընդհանուր, համաշխարհային այս մեծ գործօնի կողքին երևան եկան մի շարք ազգային Իտալիայում և Իտալիայից դուրս: Լոմբարդիայի թագաւոր Վիկտոր Էմմանուէլ, նրա հռչակաւոր մինիստր Կապուր, Ֆրանսիայի կայսր Նապոլէօն III և առաւելապէս ժողովրդական հերոսներ՝ Մաձինի և Գարիբալդի—սրանք բոլորն էլ միացրին իրենց տարբեր արժէք ունեցող ուժերը միեւնոյն նպատակին՝ հասնելու համար:

Պէտք է շեշտել, իհարկէ, որ բոլոր այս ազդեցութիւնները մէջ՝ ամենից աւելի դադարաւորական, ամենից աւելի պատկառելի մասը ընկնում է ժողովրդական տարրին, ժողովրդական դիւցազնութեան: Վիկտոր Էմմանուէլի տրամագրութիւնը, Նապոլէոնի աջակցութիւնը, Կապուրի նւերը և իմաստուն դիւանագիտութիւնը ամուլ և անպտուղ տարրեր կը մնային, եթէ դրանց չ'առաջնորդէր հսկայ զանգւածի բուռն և լիառատ անձնագոհութիւնը, անկաշառ և անարեւատ ոգևորութիւնը: Իտալիան այսպէս վերածնւեց: Միջերկրականի հին, ալեւոր հանրապետութիւնը, դարաւոր սքանչելի քաղաքակրթութիւնը չէր կարող ստրուկ մնալ Հաբսբուրգեանների արիւնստ ճանկերում... Պատմութիւնը սուտ կը լինէր, եթէ այդ դասական աշխարհը չատանար ի վերջոյ իր անկախութիւնը և իր անխախտելի իրաւունքը...

Եւ եթէ մարդկութիւնը յետագայում ոգևորւել է իտալիայի ազատութեան զրաւիչ դիւցազնավէպով, եթէ միւս ազգերը, մանր, ճնշւած, բռնաբարւած միութիւնները ներշնչւել են այդ յիշատակելի պատմական ակտով՝ դրա պատճառը ոչ թէ անշնորհաբար գաղափարն է, այլ մարդու և ազգի անկողնուկների իրաւունքների յաղթանակը: Իրերը այնպէս դասաւորւեցին և պատմութիւնը այնպէս պահանջեց, որ իտալացի մարդու և իտալական ազգի ազատութիւնը տեղի ունենար աւստրիական լծի թօթափումով և աւստրիական տիրապետութեան մերժումով: Դա գաղափարի յաղթական պատասխանն էր Վիեննայի անիրաւ և իմաստակ կարգադրութեան, դա պատմութեան դասն էր մետերնիխեան յանդուգն և սանձարձակ իշխանութեան: «Աստ հովիւները» իտալիան նետեցին այն նժարի վրայ, ուր Աւստրիան էր, որպէսզի այդպիսով հաւասարակշռւէր և չուէր եւրոպական պետութիւնների դիրքը, «վատ հովիւները» կամեցան խեղդել մի քաղաքակիրթ, տղնիւ ազգութիւն: Ժողովուրդները սակայն առաքելի ցառումով ծառայան դիւանագետների հաշիւների դէմ և մաքրեցին սեւ մարդկութեան ճակատից...

Իտալիայի ազատութեան յիսնամեակը զուգահեռաբար է մի ուրիշ յիսնամեակի հետ, որ աւելի թանգ է մեզ համար և որ այնքան նշանակութիւն ունի մեր հասարակական-քաղաքական ինքնաճանաչութեան տեսակէտից: Տաղանդաւոր հայ հրապարակախօս և յայտնի հասարակական գործիչ Մ. Նալբանդեան գրած է, կամ աւելի ճիշտ փոխադրած է, իտալիայում, 1859 թւին, ազատութեան ճակատամարտի արիւնահեղ օրերին իսկ, նշանաւոր «Մեր հայրենիք» բանաստեղծութիւնը: Արտասանւած իտալուհու բերանից, ամենաբուռն ոգևորութեամբ երգւած այդ որոտընդոտ և կուռ հիմնը այնուհետեւ՝ յիսուն երկար տարիների ընթացքում՝ դարձել է մեր երիտասարդութեան սիրելին: Մեր ժողովրդի լաւագոյն տրամագրութիւնը և մեր հասարակութեան վեհանձն բնազդները գրաւիչ պայծառութեամբ այդ բանաստեղծութեան մէջ են արտացոլել:

Ամենայն սեղ մահր մի է,
Մարդ մի անգամ պիտ մեռնի,
Բայց երանի ով իւր ազգի
Ազատութեան կը զոհնի:

Պատգամների խորունկ ոգևորութեամբ և անասան հաւատքով ներշնչւած այս բառեակը միշտ յուզել է և կարող է յաւիտեան յուզել մեր ժողովրդի բոլոր խաւերը առհասարակ: Գծարար է ցոյց տալ մի ուրիշ բանաստեղծութիւն, որ այնքան լայն ժողովրդականութիւն ունենայ, որքան վաղամեակի հրապարակագրի և անկեղծ հերոսի այս յուզիչ խօսքը...

Եւ այսօր, յիսուն տարի յետոյ, երբ մեր ժողովուրդը մասամբ անցած ազատութեան դժուարին պայքարը՝ նորէն կարող է արտասանել հայ բանաստեղծի չքնաղ երգը, նորէն կարող է դիմագրաւել մահին՝ յանուն ազատութեան, հաւատարմութեան և եղբայրութեան:

ՀԱՍԱՐԱԿԱԳԻՏԱԿԱՆ

IV

ԱԶԳԱՑԻՆ ԸՆԿԵՐԱԿԱՑՈՒԹԻՒՆՆԵՐԻ ԾԱԳՈՒՄԸ

Մարդկային ընկերակցութեան ծնունդը, նրա նախնական կերպարանքը, նրա առաջին քայլերն ու խաղաղութեամբ բնութեան անձայրածիր լաբիրինթոսում...

Ասացինք արդէն, որ այդ բոլորը տակաւին պատած է անյայտութեան մառախուղով, ինչպէս առհասարակ սօցիոլոգիական, հասարակագիտական բոլոր այսպէս կոչւած «կղերականութիւնները»:

Եւ մենք երկար չենք կանգ առնի նրանց վրայ, կը յիշատակենք ընդունւած հիպոթէզները, ենթադրութիւնները և առաջ կ'անցնենք:

«Հիպոթէզ» ասելով, չը պէտք է հասկանանք սոսկ «ենթադրութիւն»: Հիպոթէզներ կան, որոնք ընդունում են գիտական ստոյգ գրութիւնների կերպարանք: Առանց այդ տեսակի հիպոթէզների ժամանակակից գիտութիւնը արած չէր լինի այն հսկայական առաջադիմութիւնները, որ նա արել է: Գիտական միտքը առաջ է մղում իր գործունէութիւնը ոչ միայն դրական, փորձական մեթոդով (*à posteriori*), այլ և դէպքումս ի օ ն ո վ, հետեւութեամբ (*à priori*): Նա կուսում է որոշ ճշմարտութիւններ և յետոյ միայն ձգտում է հաստատել վաւերել նրանց: Նա հաստատում է *à priori* (առաջնաէ) ընդունւած գրութիւնների գիտականութիւնը միայն ժամանակ, երբ գտնում է իրականաբար համաձայնութիւն այդ գրութիւնների և գիտական հետազոտութեան բոլոր պատրաստ եղբայրացութիւնների միջև:

Այդպէս են հաստատուել բոլոր նշանաւոր հիպոթէզ-թէօրիաները, սկսած Կանտ-Լապլասեան տեսութիւնից՝ որի համեմատ երկրագունդը, արեգակը, լուսինը և բիւրաւոր մոլորակներն ու համաստեղութիւնները առաջ են եկել ժամանակի անվերջութեան մէջ միեւնոյն սկզբնական «միգալի» զանգւածից (*la nébuleuse*), որ պտտւել է շրջանաւել, ձեւափոխւել է յաւիտենօրէն տիեզերական անհունի մէջ կենտրոնաձիգ ու կենտրոնախոյս ուժերի գործակցութեամբ՝ մինչև Գարվինեան հոչակաւոր թէօրիան մ'արդ ու ա ն ա ն ա կ ա ն ծ ա գ մ ա ն մասին՝ որի համեմատ մարդկային տեսակը հանգիստնում է որպէս մի օղակ (առայժմ բարձրագոյնը) կենդանական էւօլյուցիայի երկարաձիգ շղթայի վրայ՝ մինչև Հեկկելեան հոյակապ հիպոթէզը կ ե ա ն ք ի ծ ա գ մ ա ն խնդրի շուրջը, որի համեմատ՝ տիեզերական զարգացման անդադոյն շրջաններում, ածխածնի հսկայական առատութեան շնորհիւ, կենսանիւթերի մի հզօր ու խորհրդաւոր գործակցութեամբ առաջ է եկել անօրգան, անգործարան տարրերներից հոչակաւոր մ օ ն է ի ը, պրօթօպլազմը, արարչագործ շնախանութը...

Ոչ Կանտ, ոչ Լապլաս, ոչ Գարվին, ոչ Հեկկել չեն մտել ու հետազոտել տիեզերական անցեալի այդ կորած, մշուշապատ անդունդները: Սակայն դրանց տեսութիւնները միանգամայն ներդաշնակում են գիտութեան, փորձականութեան բոլոր այլազան եղբայրացութիւնների հետ և չը կայ մի հատիկ իրողութիւն, որ հակասէ նրանց, մանաւանդ երկու առաջիններին: Չարլզ Գարվին չի գտել այն «միջին աստիճանը», փոխանցման այն տեսակը, որ կապում է մարդէակին բարձրագոյն կապկային տեսակի հետ, բայց դա չի արգելում նրան և բովանդակ. համաշխարհային գիտութեանը՝ յայտարարել համարձակ, որ այդ միջին օղակը՝ մարդու և բարձր կապիկների ընդհանուր նախահայրը՝ անպայման գոյութիւն է ունեցել որեւէ ժամանակ և որ պէտք է փնտրել նրա կմախքները երկրի խորունկ շերտերի մէջ: Գարվին, Հեկկել, Վայսման ու այլ տիեզերահոչակ գիւլիները չեն դիտել փորձականապէս, անձնապէս, թէ ինչ ձևով է այն հեռաւոր, անյիշատակ շրջաններում մարդ-տեսակը

առաջ եկել այն ընդհանուր նախատիպից. դրա հետ միասին շատ ուրիշ «բացեր» ևս կան դարձվելու տեսությունների մեջ, սակայն նրանք անգործ են խախտելու դարձվելով ներդաշնակ ամբողջությունը, հաստատուած փաստերի մի վերլուծարի լեռան վրայ, ընդունված հանրորեն, համաշխարհայնորեն — և այսօր այդ թեօրիաներն ու հիպոթեզները չգաւանդողները դուրս են գիտություններից:

Մոլոխական և Յիսուսեան արարչագործությունների «թեօրիաները» վաղուց արդէն պատմությունն սեփականություն են դարձել, նրա հետ միասին Ադամի ու Եւայի առասպելը: Մարդկությունը բացառություն չէ տիեզերքի մեջ, նա մի շնի, առանձնաշնորհեալ ստեղծագործությունն արգասիք չէ: Նա ծնունդ է, իր լուսն ու վատ բնագոյներով, տիեզերական նոյն կոյր, հզոր տարերքների, ինչպէս և ամբողջ անասնական աշխարհը. նա ծնւել է ոչ թէ մի վայրից, աստիճանական ծննդաբերութեամբ, այլ խմբումներով, հասարակութիւններով, ինչպէս բոլոր կենդանական տեսակները:

Առասպել է և նախնական Ռոբինզոնը: Մենաւոր, կղզեւայացած անհատը գոյութիւն չի ունեցել երկրի վրայ, ինչպէս որ գոյութիւն չի ունեցել յարատեւորէն կղզեւայացած մարդկային զոյգը: Պէտք է չլենք գիտությունն առած անսթիտիք ելակէտից՝ որ մարդկային գոյութեան արշալոյսին եղել են ոչ թէ մարդ-անհատներ, այլ մարդկային ընկերակցութիւններ:

Vae soli! «Վայ մենակին»... Այդպէս է եղել բնութեան անագործի ճիշդ այն սարսափելի ժամանակներում, այդպէս է նա միշտ, այդպէս է և այժմ: Անհատը մենակ հիշել է եղել բնութեան թշնամի ուժերի հանդէպ: Այս թէ ինչու — դարձվելու «բնական ընտրություն» զօրութեամբ իսկ — մարդիկ ի սկզբանէ հակառակ են եղել ապրելու ընկերակցութիւններով: Ընկերական կամ հասարակական բնագոյն (sociabilité) առաջ է բերել ամենուրեք որոշ «գործակցութիւն» (coopération) զատ զատ մարդկային համախմբումների ծոցում:

Գոյութեան կռիւն իր ահեղ, բնաշնորհ ձևով, կամ ինչպէս ասում են, «կռիւն բոլորի ընդդէմ բոլորի» չի եղել համատարած և տիրական մի իրողութիւն: Որոշ դարձվելու ներք, ժամանակակից բուրժուազական կարգերի փաստաբան գիտուններ, ճգնում են այդ ձևով պատկերացնել մեծ անգլիացու վարդապետությունը: Նրանք ճգնում են ապացուցանել, որ պատերազմը իր աւերիչ ձևերով և նրա հետևանք ծնունդն ու հարստահարությունները ճակատագրական ու անխուսափելի են մարդկության համար, որ «այսպէս եղել է միշտ, այսպէս էլ լինելու է յաւիտեականորեն», որ, հետևապէս, անհրաժեշտ է, որ մարդկությունն մի մասը իշխէ, միւսը հպատակւի ու ստրկանայ, մի մասը, մարդկային «արիստոկրատիան», պիտի մնայ միշտ զարգացման գագաթին, միւսը, «ստորին» յեղերն ու դասակարգերը, — անդունդներում...

Սակայն ինքը Գարվինը կանխել է արդէն այդ վնասակար ծայրայեղությունները, յայտարարելով, որ մարդկային զարգացման բարձր աստիճանների վրայ գոյութեան դաժան մենամարտը հետզհետեւ մեղմանում, թուլանում է ուրիշ գործօնների ազդեցութեամբ: Իսկ այսօր գիտությունը, հրահանգւած թարմ բնագիտական ու հասարակագիտական ուսումնասիրություններից, պնդում է, որ նոյն գործօնների ազդեցութեան տակ մեղմել է միշտ գոյութեան պատերազմը անգամ հեռււն, նախապատմական շրջանների մէջ, անգամ անասնական էւոլյուցիայի սանդուղքների վրայ:

Միշտ և ամեն տեղ նրան որոշ չափով հակալիւ է եղել ընկերականություն, հասարակականություն կամ փոխադարձ աջակցութեան բնագոյն — մի բնագոյն, որ ևս պէս հակառակական է (antiégoïste) և որ տարբեր ժամանակներում յորջորջւել է տարբեր անուններով. Ադամ Սմիտ, հռչակաւոր անտեսագէտը, անւանել է այն *sympaty*, համակրութիւն, իսկ յայտնի ընկերաբան (սոցիոլոգ) Օգիստ Կոնտը — աւտրութիւն, այլասիրություն: Այդ վերջին բառը և մնաց հաստատապէս սոցիոլոգիայի, հասարակական գիտությունների մէջ:

Կռիւն փաստ է. հզոր, բռնաւոր ու աւերիչ փաստ, ինչ-

պէս ուժի, կոպիտ եսի պաշտամունքը, ինչպէս դաժան էգոիզմը: Այս ուժի ժխտի այդ իրողությունը, որ ծաւալւում է մարդկային բովանդակ էւոլյուցիայի վրայ և որ մերթ ընդ մերթ — ոչ միշտ, ինչպէս ուզում են հաւատացնել պատերազմում գիտուններն ու դիպլոմատները — խաղացել է շինարար, քաղաքակրթող, գրական դեր:

Սակայն, պատմական իրականությունը արդեւում է պնդել, որ այդ բերտ ուժի պաշտամունքը, պատերազմների ու ճրջման ուժի յատուկ է մարդկային բնութեանը, յաւիտեանորէն ու ճակատագրորէն անհրաժեշտ: Նախնական վայրերի ու բարբարոս, նոյնիսկ մեր, քաղաքակրթի հասարակութիւնների պատմությունն նորագոյն ուսումնասիրությունները պարզում են, որ այդ հասարակությունների մէջ ազգական, բռնասիրական հակումների դիմաց՝ իր պատկառելի տեղն է ունեցել նաև ընկերական համերաշխութեան էապէս խաղաղասէր բնագոյն *):

Ծանօթ իրողութիւն է, որ պատմաբանները իրենց հետազոտությունների մէջ սովորաբար կլանւում են ազգերի կենսաբան դրամատիկական, ցնցող ու շառաչուն դրաճներով, պատերազմներով, յաղթութիւններով ու պարտություններով և դժբախտաբար շատ սակաւ ուշադրություն են ներդնում ժողովուրդների մասնաւոր կեանքի և աշխատանքի արտադրատեսակներին, ուր առհասարակ բաւականաչափ ուժեղ շեշտւել է աւարտիստական շինարար բնագոյն, խաղաղասիրությունն ու համերաշխութիւնը:

*

Ինչպէս առաջացաւ մարդկային ընկերակցութիւնը ազգային ընկերակցութիւնը...

Ինչպէս կազմակերպւեց ազգայնական առանձնայատուկ բնաւորությունը, ոգին, գիտակցությունը. երբ, որտեղ, ինչ պայմաններում են հաստատուել այդ վիթխարի ու զառաւմեալ ազգային քաղաքակրթությունները: Չհաստատուած, չնդկատանում, Եգիպտոսում, երբ են ծնունդ առել պարսկական, հրէական, հայկական, յունական ու այլ անթիւ ազգութիւններն ու հայրենիքները, և ի՞նչ ձև է ունեցել նրանց սկզբնական հասարակակարգը...

Ինչպէս իմանալ... Մի բանի հազար տարի է միայն, ինչ լուել է «պատմություն» առաջին թաթովանքը: Մի բանի հազար տարիէն անդին՝ ամեն ինչ խորասուզւած է «նախապատմական» աղջամուղջի մէջ:

Եւ այնուամենայնիւ, հասարակական գիտությունը այնքան էլ անձաւ չէ: Նա ունի իր ձեռքում հետազոտությունն ան ուղղակի ժամանակի մեթոդը: Եթէ չենք կարող ծանօթանալ այն անյիշատակ անցեալին հետ ուղղակի, անմիջապէս, կարող ենք ծանօթանալ անուղղակի կամ, մնացել են բարեբախտաբար, երկրագնդի այլեայլ ծայրերում վայրերի ու բարբարոս մարդկային զանգւածներ, որոնք անթիւ դարերից ի վեր ապրում են անշարժ, գրեթէ քարացած վիճակում և նրանց մէջ ցայտում են, անտարակոյ, նախնի մարդկության բնորոշ գծերը: Ուսումնասիրել այդ վայրերի համայնակեցողը, միևնոյն է թէ ուսումնասիրել մեր հեռււն, անյիշատակ նախնիքներին: Եւ հասարակական գիտությունը — մասնաւորապէս նրա մի ճիւղը — ցեղագրութիւնը (ethnographie) — վերջին 40—50 տարիների ընթացքում շատ բան է արդէն փաստակել այդ հետազոտություններով: Մի շարք փայլուն խուզարկու գէմբեր — Բախոֆէն, Մակ Լեննան, Մորգան, Տայլոր, Սպենսեր, Մաքսմուլլանդ, Կոլլապսի կայն — ահագին զարկ են տւել նախամարդու և առաջին հասարակությունների ու հաւաքական հաստատությունների ուսումնասիրությունն, արել են անգնահատելի գիւտեր, որոնք ուժգին լոյս են սփռում նախապատմական խաւարի վրայ: Երկրագիտությունն ու հնէաբանությունը, երկրագնդի խորունկ շերտերում գտնւած հազարաւոր կմախքային, գործիքային մնացորդների ուսումնասիրությունն հիման վրայ աշխատեցին կառուցանել, վերարտադրել նախ-

*) Տես. Kropotkine, L'Entente-aide.

ընդարձակ տարածութիւններ, սեփականացրել է հողը (համայնական, ոչ մասնաւոր սեփականութիւն), հաստատել է մշտնջենաւոր բնակութիւն: Տոհմային համայնքի այդ մշտական բնակահաստատումը մէկն է քաղաքակրթութեան զարգացման ամենաուշագրաւ ու ամենաարգասաւոր հանգրեւաններից: Նա չէր կարող տեղի ունենալ որսորդութեան ու խաշնարածութեան շրջաններում, երբ մարդիկ ստիպւած են եղել իրենց չնչին գործիքների ու նախիրների հետ լծափառել յաւիտենորէն: Նա—այդ մշտական վերահաստատումը որոշ հողի վրայ—կարող էր միայն զուգադիպել երկրագործութեան բարեբախտ շրջանի հետ, երբ աշխատանքի ու արդիւնաբերութեան գործիքները բաւականաչափ մշակելով, կատարելագործելով, հնարաւորութիւն են ընձեռել մարդկային համայնքներին՝ զբաղւելու հողի մշակութեամբ ու շահագործմամբ:

Այդ հանգամանքը, դառնալով հանգերձ մի տեսակ չուկէտ քաղաքակրթութեան էւօլյուցիայի, զարկ տալով հանգերձ հասարակութիւնների նիւթական բարօրութեան, ապրանքների, ապա և մտքերի ուժգին փոխանակութեան տարբեր կէտերի համայնքների միջև—միևնույն ժամանակ ստեղծագործեց մէկն այն բազմութիւն խորհանդիսներից, որոնց վրայ պիտի բարձրանար ապագայ «ազգի», հայրենիքի շէնքը:

Հողը, անշուշտ, հանգիստում է առհասարակ ազգայնութեան անհրաժեշտագոյն ստորոգելիներից միւնը: Ասում ենք՝ առհասարակ, որովհետեւ կայ բացառութիւն: Իրականութիւնը վկայում է, որ ազգայնութիւնը կարող է պահպանւել նաև հողը կորսելուց յետոյ: Հրէեւթիւնը, վաղուց զրկւած հայրենի հողից, ցիր-ցան աշխարհի բոլոր ծայրերում, պահպանել է շատ տեղերում «ազգային համայնքի» և ազգայնական գիտակցութեան իր յատկանիշները:

Այդ մի հատիկ բացառութիւնը հաստատում է ընդհանուր օրէնքը: Ընդհանուր հողը նոյնքան ուժեղ մի գործոն է ապագայ ազգութեան համար, որքան ընդհանուր ծագումը: Այդ վերջինը նոյնպէս չի հանգիստում միայնպիսի տիրական գործոն, որի ներկայութիւնը անհրաժեշտագոյն պայման լինի, *contitio sine qua non* աշխարհի բոլոր ազգերի համար: Նա եղել է, ըստ երևոյթին, միայնպիսի պայման հին ժամանակում. արդարեւ, բոլոր հնագոյն ազգութիւնների գոյութիւնը ենթադրում է ընդհանուր ծագման, արիւնակցութեան փաստը: (Արիւնակցութիւնը այստեղ, ի հարկէ, պէտք է հասկանալ շատ թեք նեղ ու սերտ իմաստով, որովհետեւ լայն, ընդարձակ մտքով արիւնակցից են երկրագնդի բոլոր մարդիկ, բոլոր, անգամ ամենահակոտնեայ, ցեղերը): Այդպէս չէ, սակայն, պատմութեան համեմատաբար նոր շրջաններում: Ֆրանսիա, Իտալիա, Անգլիա, Ամերիկա, ժամանակակից գրեթէ բոլոր ուժեղ ազգերը խառն, այլատարր ծագումն ունին: Նրանց բոլորի գոյացման պրօցեսին հաղորդակից են այն անհամար ու այլազան ցեղազոտական տարրերը, որ բերել էր իր հետ ազգաբնակչական մեծ փառքը ասիական հօրիզոններից:

Անշուշտ, հին «կլասիկ» ազգութիւններն ու ցեղերը ևս չեն պահպանել արեան բացարձակ կուսութիւնը, մաքրութիւնը: Չէր կայ «մաքուր ցեղ» բառիս բացարձակ նշանակութեամբ և գուցէ լաւ է, որ չէր կայ. ցեղերի արեան որոշ խառնուրդը օգտակար է դիտւում նրանց զարգացման համար: Արիւնները խճողւել ու խառնւել են ազգաբնակչական շարժումների դարաւոր յորձանքների մէջ: Անգամ ուռւ ազգը, որ համեմատաբար դեռ շատ երիտասարդ է, չի կարող փաստաբանել իր «մաքրութիւնը», նրա արիւնի մէջ կայ թաթարական արեան բաժինը—և շատ խոշորը—արդիւնք թաթար հօրանների դարաւոր տիրապետութեան Ռուսաստանում:

Այնուամենայնիւ, հին ազգերը դեռ կարող են հռչակել իրենց ընդհանուր ծագման փաստը, կարող են խօսել որոշ չափով և արիւնի մաքրութեան մասին, քանի որ իրօք, չէր նայած դարերի խճողումներին ու խառնուրդներին, նրանք պահպանել են իրենց նախնական, պապնական յայտնիքները: Ժամանակակից հրէան—ասում է պարիզեան յայտնի հոգեբան Ռիբո—ոչնչով չի տարբերւում իր այն նախնիք-

ներից, որոնք ապրել են տանեակ դարեր սրանից առաջ: Նայն ֆիզիկական ու հոգեկան գծերը, նայն խառնածքը, տեմպերամենտը:

Նայն չէ՞ կարելի առել արդեօք հայութեան մասին: Չէր նայած ճակատագրի անօրինակ խաղերին, հայ երկրի վրայից անցած անհատնում փոփոխիւներին, կրօնափոխութիւններին, բռնի ու կամաւոր խառնամուսնութիւններին՝ այդ ժողովուրդը չի՞ պահպանել արդեօք իր նախնիքների ֆիզիոլոգիական ու հոգեկան հիմնագծերը: Այդ հարցման դիմաց բաւականաչափ հրահանգիչ են այն դիտողութիւնները, որ կարող ենք անել թէ ժամանակի և լիէ տարածութեան հարթութիւնների վրայ: Անցեք հայկական դիասպորան երբ, մի պտոյտ արեք թէկուզ աւստրիական Լեհաստանի, Տրանսիլվանիայի, Ունգարիայի հայ գաղութների մէջ, որոնք փռւած են փոքրիկ բեկորներով օտար, այլալեզ ազգութիւնների մէջ, ձուլւած նրանց հետ լեզուով, բարբով, քաղաքակրթութեամբ, ամեն բանով, բայց... մայր-ժողովրդի անտրօպօլոգիական, մարդաբանական բնորոշ գծերից: Այդ վերջինները պահպանւել են ապշեցուցիչ յատկութեամբ: Այդ մի տանեակ հայածագում պատգամաւորները ունդարական պարլամենտում և այդ 4—5 սերիները աւստրիական ռայխսրատի մէջ, բոլոր այդ Լուկաշները, Դանիէլներն ու Գօրօվէները, Գէյզաներն ու Աբրահամշները զատւում են իրենց միջովայրի ընդհանուր ֆօնի վրայ, ինչպէս սեւ ճերմակի վրայ: Տիպը նոյնն է, ինչ որ հեռաւոր Ղարաբաղում ու Գողթանում, Էրզրումում ու Վասպուրականում: Եւ սակայն ռպիսի անշրպետներ ևս բաժանում այդ համայնքները մայր-հայրենիքից և քանի՞ դարեր են զլորւել Անիի ու այլ վիթխարի կատաւորօջների օրերից ի վեր, որոնք դուրս են ժայթքել այդ արմատալի բեկորները, շարտել նրանց աշխարհի հեռու ծայրերը, խզելով իսպառ նրանց կապը հայրենիքի հետ...

Ընդհանուր ծագումը ուժեղական, ուժեղ մի փաստ է: Նրա էութիւնը և յարատւութեան պատճառները կը պարզենք յետագայում. առայժմ վերադառնանք նախնական «տոհմերին» և առաջ քաշենք մարդկութեան յամրւթեաց էւօլյուցիայի լիւնը:

Մենք տեսնեց յերեմն գենսի մէջ ապագայ ազգայնութեան առաջին թոյլ սկզբնաւորութիւնը, սաղմիկը: Բայց նրան զարգացնելու համար, անհրաժեշտ էին սերիչ գործոններ:

Գենսական կամ տոհմային կազմակերպութիւնը իր մայրական իրաւունքի՝ տիրապետութեամբ, իր համայնական կարգ ու սարքով—յաւիտենական չէր: Ինչպէս ամեն մի սերիչ հաստատութիւն, նա պէտք է կործանւէր ժամանակի համայնաշինչ հոսանքի մէջ—և կործանւէր:

Սօցիօլօգիներից ու փիլիսոփաներից ոմանք ողբում են այդ կործանումը, ուրիշները—ընդհակառակը: Պէտք է յիշատակել, որ դեռ վաղուք, մարդկային այդ նախնի հասարակարգի մասին եղել են երկու տարբեր, տրամագծօրէն հակառակ կարծիքներ: Մէկը, իրեն թարգման ունենալով անգլիացի հասարակագետ-փիլիսոփայ Հօբսըս, ներկայացրել է այդ առաջին հասարակարգը, որպէս Դանտէյեան մի գոթիսը: Այնտեղ, ասում է Հօբսըս, բիրտ էգօթիսի և վայրագ ուժի բացարձակ տիրապետութիւնն էր... Վո՛ւ է երբ բոլորի ընդդէմ բոլորի, մարդը գայլ էր իր նմանի դիմաց *Homo homini lupus!*...

Միւս կարծիքը, ի դէմս մեծանուն Ժան Ժակ Ռուսօյի՝ իդէալականացրել ու երգել է մարդկութեան նախափիճակը: Այնտեղ, ասում է Ժան Ժակը, հովեւերգական այն շրջանում՝ ալտրոնիզմի, փոխադարձ սիրոյ, հաւասարութեան, պարզ, անվթար բարքերի թագաւորութիւնն էր, որ կուլտուրան, քաղաքակրթութիւնը յետագայում աղճատեց, թունաւորեց, անբարոյացրեց... Այնտեղ մարդը աստուծ էր, հրեշտակ էր իր նմանի համար, *Homo homini Deus!*

Երկու հայեացքներն էլ մեղանշում են իրենց ծայրայեղութեամբ: Նախնական համայնքները արժանի չեն ոչ խանդավառ իդէալացման ու փառաբանութեան, ոչ էլ ատելութեան ու նշաւակման: Իրողութիւնը, պատմական, հասարա-

կազմակերպողներին այն է, որ այդ նախնի մարդկային համայնքների մեջ եղել է, անշուշտ, գոյություն ունեցող է և էգոիստական տիրապետության բիրտ բնագործը, որ վայրենի ու բարբարոս համախմբումները, անշուշտ, յաճախ գրոհ են տեսել իրարու դեմ, ծառայել իրար, բնաջնջել, որ «Անդեոտայի», արիւնարբու վրէժխնդրության ահեղ դոգմը, այո՛, եղել է մարդկային հատկանիշների փոխադարձ յարաբերության մեջ, բայց այդ բոլորի հետ միասին իրողություն է և այն, որ այդ վայրենությունն ու բարբարոսությունն ծոցում բաւականաչափ մշակել ու հաստատել է — թէկուզ անձուկ, սահմանափակ հորիզոններում — նաև աշտուղիկ ու համայնական ներգաշնակության աշխարհաշէն բնագործը:

Էւօլյուցիան կանգ չ'առաւ այդ կէտի վրայ և լաւ եղաւ, որ կանգ չ'առաւ: Գենսական, համայնատիրական այդ «իդիլիայի» (հովեւերգության) այդ կործանումներից յետոյ, իրաւ է, եկան հետզհետեւ աւելի և աւելի խոշոր գուլումներ մարդկությունը գլխին, սարսափի ու արհաւիրքի հորիզոնները միշտ աւելի ձգեցին, լայնացան, պատերազմները գուցէ աւելի յաճախացան, անհատական և սեփական ու ընտանիքի նորածագ դուստնների մեջ աճեցին եգոիզմի, բռնի ուժի ընչաքող շահատակութիւնները, ծնեցին դասակարգերը, որոնք առաջ գրեթէ չը կային, ծաւալեցին դասակարգերի սանձարձակ անորոշութիւնները ու մրցումները, և այդ բոլորի մեջ, գուցէ, այո՛, ժամանակաւորապէս հայեցին, անհետացան «հին, բարի ժամանակները» հովեւերգական առաքինութիւնները, արեան անյագ Մողբն, այո՛, ուղեկցեց այնուհետեւ երկար դարեր շարունակ ազգերի, պետութիւնների, համայնակի ու դժոխակ բռնապետութիւնների երկունքներին ու ծաւալումին... Ի՞նչ արած: Քաղաքակրթութեան երկունքը կատարում է անբաւ ու դժոխային տանջանքներով... Մարդկությունը չէլ էր զարհուրանքից, պիտի անցնէր զարհուրանքից, ուր-մոլոր ուղիներով, արիւնով ու արհաւիրքով, որպէս զի հասնէր ի վերջոյ աշտուղիկ ու միահեծան բար-րութեան «սկիզբներին», որ սպասում է նրան ապագայում... Եւ արդարեւ, նախանձելի չէր լինի նրա կուտուրան, եթէ նա միշտ գեղեցիկ այդ նախնական աստիճանների վրայ, «մշինային ազգութիւնները» վիճակում Հակադուլթիւնները զարգացան գենսի ծոցում, քայքայեցին, ժխտեցին նրա էությունը և ծնունդ տւին նոր ընտանիքի, որ վաղ թէ ուշ, իր հերթին ապագայում պիտի ժխտէր ու ծնունդ տայ համապարփակ ու հաշտարար սինթէզին... Տեղն է յիշել հեգելեան հոյակաւոր տրիտիալը, եռաստիճան ֆորմուլը, իր «գրութեամբ», «հակադուլթեամբ», «համադրութեամբ» (թեզ, անտիթեզ, սինթեզ): Հին, սոհմային կամ գենսական կօմպունիզմը (թեզ, գրութիւն) պիտի բացասէր ճակատագրականորէն և պիտի տեղի տար մասնաւոր աշխատանքի ու սեփական ու ընտանիքի ընդհանրացման (անտիթեզ, հակադուլթիւն), որը տիրելով անթիւ դարեր, հասնելով մինչև ներկայ ժամանակները, պիտի «բացառէ» կամ կործանէր ապագայում, նոյն յարակաւ տրամաբանական ուժերի մղումով և պիտի տեղի տայ մի նոր, աւելի բարձր տեսակ կոմպունիզմի, որը լինելով «բացասութիւն բացասութեան» (Negation der Negation), հանդիսանալով որպէս գերագոյն ու բազմալի համադրութիւն (սինթեզ), պիտի հաստատէ վերստին համայնական սեփականութեան, աշխատանքի ու վայելումի այն նախնական ընտանիք, բայց արդէն ճոխացած, կատարելապէս արդարաւոր տարիների կուտուրական զարգացման արդիւնքներով, գանձերով...

Գենսը քայքայեց, որովհետեւ չը կարողացաւ դիմանալ ժամանակի յարաճուն ուժերի բաղնուկներին: Տնտեսական գործոնները չէին միակ դերակատարը այդ պատմական կամ աւելի ճիշտ՝ նախապատմական դրամայի մէջ: Նրանք իրենց գործակից ունեցան զուտ բնական ազդակները: «Տնտեսական մատերիալիզմը» միակ թէօրիան չէ, որ կարող է լոյս տեսնել մարդկութեան էւօլյուցիայի այդ ծանրակշիռ գրաւոր վրայ. կայ և զուտ «բնական մատերիալիզմը»:

Բացատրենք:

Անուրանալի է, որ զուտ տնտեսական ազդակները պատ-

կառելի դեր են խաղացել նոյնիսկ այդ նախապատմական էւօլյուցիայի մէջ: Երբ ասում ենք «տնտեսական ազդակներ», պիտի հասկանանք ամենից առաջ, արդիւնադործութեան միջոցներ, աշխատանքի գործիքներ, նրանց հետզհետեւ զարգացումն ու կիրառումները: Արդիւնադործութեան այդ միջոցների աստիճանական մշակման ու կիրառումների շնորհիւ, միշտ աւելի և աւելի աճում էր մարդկային աշխատանքի արգասաւորութիւնը (productivité du travail), որը չնչին էր սկզբնական շրջաններում, շնորհիւ նոյն միջոցների կոպտութեան, խոպանութեան: Աշխարհագրական, նիւթական միջավայրը օգնութեան հասաւ մարդկային մտքին ու հնարագիտութեան և երեւան եկան ժամանակի ընթացքում աշխատանքի ու արդիւնաբերութեան նորանոր գործիքներ ու միջոցներ. կոպիտ քարի ու կայծքարի տեղ՝ մետաղների ալյուրալ տեսակներ, կրակ, մետաղի ձուլման միջոց, որսորդութեան նոր գէնքեր, հողագործութեան, ջրային հաղորդակցութեան միջոցներ և այլն: Եւ այդ բոլորի հետեւնօք — մարդկային աշխատանքը՝ աւելի գիւրդին, աւելի արգասաւոր. մարդ-էակի արժէքը աւելի բարձրանալիս, շեշտւելիս... Ահաւասիկ ծանրակշիռ իրողութիւններ, որոնց վիճակաւ էր ուրիշ, բնական ազդակների գործակցութեամբ, յեղաշրջել, կերպարանափոխել աշխարհի երեսը:

Ի՞նչ է նշանակում աշխատանքը աւելի արգասաւոր: Դա նշանակում է, որ ուժեղ ու կորովի, աշխատասէր ու նախաձեռնութեան ոգով օժտւած անհատներ կարող էին իրենց սեփական ուժերով արտադրել ալյուրալ կենսական բարիքներ, ձեռք բերել յարաբերական հարստութիւն ու երջանկով իւն: Մինչդեռ նախնի ժամանակներում ստիպւած էին ամենաչնչին բարիքները, ապրուստի ամենաանհրաժեշտ պիտոյքները ձեռք բերել ընդհանուր, համայնական ուժերով:

Ահա այդպէս է անդրադարձել արդիւնաբերութեան գործիքների զարգացումը նախնի ուղեղների վրայ, այդպիսի մտքեր է յարուցել նա շատ թէ քիչ մտածող գլուխներում: Եւ այդ «դաւաճան» մտքերն արդէն ձգել են անշատակաւ ու թեւեւ ուրիշ համայնական կարգերի մէջ, սկիզբ են դրել կեանքի օրոհման ձգտումներին և համայնքի քայքայման: Գենսական, համայնական կազմակերպութեան ծոցում կամայ-կամաց բուն են դրել ձեռնարկել և անհատական ոգով առողւորւած անհատներ և ամբողջ ընտանիքներ. առաջ են եկել հայրական զատ-զատ ընտանիքները հայրապետի կամ նահապետի բացառիկ խնամակալութեան տակ: — Հսկայական գերդաստաններ, մէկ ընդհանուր յարկի տակ, կազմւած սովորաբար մի քանի հարիւր անդամներից, զաւակներից, թոռներից, ծոռներից, առններից, ապա և ծառաներից, աղախիւններից — որ աշխատել են միասին և իրենց աշխատանքի արդիւնքները սեփականել ու վայելել: Այդպէս է ծնւել մասնաւոր սեփական ու ընտանիքի ընդհանրացման հաստատութիւնը, որ աստիճանաբար աճելով, ծաւալւելով, ի վերջոյ պատճառ է եղել — մէկը խոշոր պատճառներից՝ վաղեմի համայնական հաստատութիւնների կործանման: Մէկը խոշոր պատճառներից... Բնական, բիօլոգիական ուժերը աշակցեցին տնտեսական գործոններին այդ ճակատագրական պրօցէսի մէջ:

Նախ — մարդկանց աճումը, որ սնունդի պակասութեան շնորհիւ, յարուցել է այն նախնական շրջաններում ազգաբնակչական անվերջ շարժումներ: Յաճախ, վաղեմի արիւնակից տոհմը քայքայւել է հենց այդ շարժումների կոհակների տակ: Մայր-գերդաստանից անջատւել են ամբողջ զանգւածներ և չէլ գէպի հեռաւոր վայրեր, սնունդ ու արիւնքներ փնտրելու: Եւ այդ վիճակը ինքնին արտադրել է մշտնջենաւոր բաղնուկներ, պատերազմներ *):

*) Ազգաբնակչութեան անուր, որ մէկն է նախնական էւօլյուցիայի խոշորագոյն գործոններից, հանդիսանում է զուտ բնական կամ բիօլոգիական մի երեւոյթ, որ դուրս է սնեսական-հասարակական ազդակների խաղերից: Մարդկութեան զարգացման ու առաջադիմութեան խթանը ոչ միայն զուտ սնեսական գործոնն է, ոչ միայն ապրուստի նիւթական միջոցների առաջադիմութիւնը, այլ և — ի շարքում այլ

